

太原衛生調查班

修卷 第五五号

昭和十二年三月一日

備查

汾州府志卷之二

星野

星野之說見於周官經保章氏以星土辨九州之地所封封域皆有分星以觀妖祥今府境主晉言則參之野晉始封在今平陽府翼城縣西南二十里之故唐是府境與平陽猶之吳與越同分也

國語董因對晉文公曰實沈之墟晉人是居所以興也左氏春秋子產語叔向曰昔高辛氏有二子伯曰闕伯季曰實沈居於曠林不相能也日尋干戈以相征討后帝不臧遷闕伯於商邱主辰商人是因故辰



爲商星遷寶沈於大夏主參唐人是因以服事虞夏  
其季世曰唐叔虞當武王邑姜方震大叔夢帝謂已  
余命而子曰虞將與之唐屬諸參而蕃育其子孫及  
生有文在其手曰虞遂以命之及成王滅唐而封大  
叔焉故參爲晉星由是觀之則實沈參神也史記天  
官書晉之疆占於參罰案大夏服注云在汾澮之間  
而杜元凱云今太原晉陽也史記禹鑿龍門通大夏  
張守節引括地志云大夏今并州晉陽及汾絳等州  
是此蓋兼服杜而會通爲一又世本言唐叔虞居鄂  
宋忠注鄂地今在大夏括地志故鄂城在慈州昌寧  
縣東二里唐慈州卽今吉州昌寧今爲鄉寧縣顧炎

武日知錄曰封禪書齊桓公西伐大夏考之於傳則  
曰自高粱而還高粱在今臨汾縣合是數說大夏近  
澮而遠於太原服說視杜爲優

其後三家分晉或以府境屬趙主趙地昴畢之分野爲  
言然邊境相錯遠於國都執一時疆界所及強與天合  
疎矣况今之府州縣尤不當泥古列國之占星鄭康成  
云星土星所主土也其書亡矣堪輿雖有郡國所入度  
非古數也星土之書旣亡後人輾轉傳合大致皆如康  
成氏所謂非古數者夫歲在實沈而晉文公返國太白

食昴而趙括長平之事。黃星出昴畢之分五十餘日而元魏起於代北。太白晝見在參而太武幸隰城用兵西河。四星聚觜觶參分而高齊始霸。流星出昴北東南流轆畢貫參光明照地有聲如雷而尔朱氏殲於赤洪嶺。晉趙之地上協大梁實沈。自古以來占應不爽。推而至於一郡一邑。晝然辨其星度。則其求益密。其說益繁。善夫子產有言。天道遠。人道邇。揚子雲曰。史以天占人。聖人以人占天。居官守土者。其盡心於人事。俾無闕失焉。民之休祥眚災。感召補救。求諸切要之至道。雖勿問占候可也。

漢書地理志。魏地。觜觶參之分壘也。其界自高陵以東。盡河東河內。南有陳留。及汝南之召陵。滎彊新汲。西華長平。潁川之舞陽。鄆許。僞陵。河南之開封中牟。陽武。酸棗。卷。皆魏分也。趙地。昴畢之分壘。趙分晉得趙國。北有信都。真定。常山。中山。又得涿郡之高陽。鄭州。鄉。東有廣平。鉅鹿。清河。河間。又得勃海郡之東平。舒中。邑。文安。東州。成平。章武。河以北也。南至浮水。繁陽。內。黃。斥。邱。西有太原。定襄。雲中。五原。上黨。上黨本韓之別郡也。遠韓近趙。後卒降趙。皆趙分也。秦地。東井。與鬼之分壘也。其界自宏農。故關。以西。京兆。扶風。



馮翊北地上郡西河安定天水隴西南有巴蜀廣漢  
犍爲武都西有金城武威張掖酒泉敦煌又西南有  
牂柯越巂益州皆宜屬焉案孟堅作志列秦魏周韓  
趙燕齊魯宋衛楚吳粵分野之詳舉漢時郡縣隸之  
今錄魏趙秦三國其郡縣與星之所分皆不足深據  
夫魏都安邑爲觜觿參之分仍參爲晉星之舊也趙  
都邯鄲去晉故都已遠是以不與晉同今府境乃趙  
地之邊魏者遠趙近魏宜同於晉志以西河屬秦太  
原屬趙漢西河郡治雖在河西而跨至河東今府境  
得其河東之地及太原郡之西南論秦晉之分野自  
當以河爲界地在河西者雖舊屬趙魏亦同秦分地  
在河東者雖後入於秦亦不得謂非晉分然則漢志  
所列卽鄭康成謂郡國所入度非古數者耳以戰國  
時朝此夕彼犬牙交錯之疆界定星之分野不待辨  
而知其多疎矣

星經胃昴趙之分野冀州畢觜參魏之分野益州危  
室壁衛之分野并州春秋元命苞昴畢間爲天街散  
爲冀州分爲趙國立爲常山觜參流爲益州營室流  
爲并州分爲衛國蔡邕月令章句自胃一度至畢六  
度謂之大梁之次趙之分野自畢六度至并十度謂

之實沈之次晉之分野皇甫謐帝王世紀自胃七度至畢十一度曰大梁之次今趙分野自畢十二度至東井十五度曰實沈之次今晉魏分野晉書天文志十二次魏太史令陳卓言郡國所入宿度自胃七度至畢十一度爲大梁趙之分野屬冀州自畢十二度至東井十五度爲實沈魏之分野屬益州自危十六度至奎四度爲媿訾衛之分野屬并州州郡躔次尾箕燕幽州西河上郡北地遼西東入尾十度東井與鬼秦雍州太原入東井二十九度文獻通考洪氏曰晉天文志謂自危至奎爲媿訾衛之分野屬并州衛

本受封於河內商虛後徙楚邱河內乃冀州所部漢屬司隸其他邑皆在東郡屬兗州於并州了不相干而并州之下所列郡名乃安定天水隴西酒泉張掖諸郡自係涼州耳又謂自畢至東井爲實沈魏之分野屬益州魏分晉得河內河東數十縣於益州亦了不相干而雍州爲秦其下乃列雲中定襄鴈門代太原上黨諸郡益又自屬并州及幽州耳晉書出於李淳風之手豈非蔽於天而不知地乎案星經春秋緯皆兼言州國其於國之分星與漢書地理志無大異而所配之州則絕不可通故蔡氏皇甫氏之書但舉

國而不及州星經春秋緯以星言蔡氏皇甫氏以十  
二次言鄭康成注周禮云大界則曰九州州中諸國  
中之封域於星亦有分焉其書亡矣是星土之說以  
九州爲大限書亡而星經等書就國有分星傳合州  
之大界宜其轉相刺謬鄭君言諸國中之封域於星  
亦有分則不獨國有分星國中地域遠於國都者其  
上應之星自不得盡同如晉地兼及河外不必亦占  
於參也鄭君之言又曰今其存可言者十二次之分  
也星紀吳越也元枵齊也娵訾衛也降婁魯也大梁  
趙也實沈晉也鶉首秦也鶉火周也鶉尾楚也壽星  
鄭也大火宋也析木燕也大致諸家說悉本此然十  
二次之名起於二十八舍而二十八舍則列星之與  
黃道相值者皇甫謐及陳卓所分十二次本漢書三  
統歷前漢未有黃道宿度其度乃赤道度也後漢永  
元四年賈逵始言赤道爲中天非日月道而典星待  
詔姚崇等十二人皆曰星圖舊有規法日月實從黃  
道官無其器不知施行十五年七月甲辰詔書造太  
史黃道銅儀是爲列宿有黃道度之始左氏春秋葵  
女爲元枵之維首又云元枵虛中也用太史黃道銅  
儀之度遞之則當以自婁十一度至畢二度謂之大



梁之次自畢二度至非五度謂之實沈之次而蔡氏徒以當時冬至日躔斗二十度有奇爲星紀之中故云日至其初爲節氣至其中爲中氣此由不明於二十八舍雖與日行黃道相值而星與日各自運行也列宿十二次終古不變而黃道十二宮冬至恆在子宮之半亦終古不變黃道隱而列宿顯故借十二次記之曰某日時刻躔某次幾度分冬至以中節氣從十二次不可以次從中節氣推移今西洋之術知恆星右旋以成歲差矣而冬至日在箕二度有奇謂之曰日躔星紀之次此由不知十二次之名起於列星不可以名黃道之十二宮也改析木爲星紀十二次之名悉隨之迭更與漢人不知歲差所以失不同而其失則同又自漢而下以節氣過宮大雪日躔星紀之初西洋術以中氣過宮冬至日躔星紀之初夫中者一宮之中也節者兩宮之間也以中氣過宮則中氣居兩宮之間而節氣反居一宮之中名實相悖此又其失之大者故西洋之術尤不可用以論星次至若晉天文志之謬洪氏已辨之然洪氏言衛受封於河內後徙楚邱則不解衛占於媯訾非河內及楚邱之衛乃成公遷於帝邱以後之衛也左氏春秋昭公



十七年冬有星孛於大辰西及漢梓慎曰星孛天漢漢水祥也衛顛頊之虛也故爲帝邱其星爲大水帝邱漢東郡濮陽縣今大名府開州也心爲大火定爲大水營室東壁四方似口故名姬訾之口詩定之方中亦以其方言之姬訾衛之分野天官家並同其曰屬并州則與星經春秋緯同一謬耳後言西河入尾十度太原入東井二十九度尤迷謬滋惑諸說刪取其語涉并冀太原西河者論之餘不備錄

唐書天文志初貞觀中淳風撰法象志因漢書十二次度數始以唐之州縣配焉而一行以爲天下山河之象存乎兩戒北戒自三危積石負終南地絡之陰東及太華逾河並雷首底柱王屋太行北抵常山之右乃東循塞垣至濊貊朝鮮是謂北紀河源自北紀之首循雍州徼達華陰而與地絡相會並行而東至太行之曲分而東流與涇渭濟瀆相表裏謂之北河北紀山河之曲爲晉代北紀之東至北河之北爲邢趙七國之初天下地形雌韓而雄魏其後魏徙大梁則西河合於東井秦拔宜陽而上黨入於輿鬼古之辰次與節氣相係各據當時歷數與歲差遷徙不同今更以七宿之中分四象中位自上元之首以度數

紀之而著其分野其州縣雖改隸不同但據山河以分爾觜觶參伐實沈也初畢十度餘八百四十一秒四之一中參七度終東井十一度自漢之河東及上黨太原盡西河之地古晉魏虞唐耿揚霍冀黎郇與西河戎狄之國西河之濱所以設險限秦晉故其地上應天闕其南曲之陰在晉地衆山之陽南曲之陽在秦地衆山之陰陰陽之氣并故與東井通河東永樂芮城河北縣及河曲豐勝夏州皆東井之分參伐爲戎索爲武政當河東盡大夏之墟上黨次居下流與趙魏接爲觜觶之分案一行據山河以分於義爲近其大夏之稱從杜元凱太原爲大夏蓋分河東太原應參西河之濱應天闕而雜舉秦地北抵黃河之南豐勝等州及晉地南抵黃河之北芮城河北等縣以爲與東井通徒就十二次均分星度一次得三十度有奇勢必舉參而連及東井耳泥於天之一次所終而以地傳合之與泥於地之一國所至而以天強就之其失同也且於河渭之南舉終南太華河之北舉積石三危太行常山同爲北紀殊失地之分理脈絡至云魏徙大梁則西河合於東井秦拔宜陽而上黨入於輿鬼彼此遷就益涉支離矣

宋史地理志河東路當冀參之分。明史天文志畢七度至井八度實沈之次也。山西之太原府石忻代李定保德岢嵐六州平陽府皆參分。絳蒲吉隰解霍六州皆冀參分。澤汾二州皆參分。案明志所載出清類天文分野書成於洪武十七年。是時汾州領孝義介休平遙三縣石州領寧鄉縣臨縣隸太原府石樓縣隸隰州以太原平陽汾石皆專屬參。惟隰州兼冀參。參言之。然其一州三縣石樓最北亦專屬參可知也。府境分野此爲近是。

史記天官書晉之疆候在辰星星經辰星主恆山冀州幽州并州斗九星第九星主并州常以五申日候戊申爲西河庚申爲太原定襄周禮疏引春秋緯文耀鉤云太行以東至碣石王屋砥柱冀州屬樞星唐書天文志一行以爲斗杓謂之外廷陽精之所布也斗魁謂之會府陽精之所復也杓以治外故鶉尾爲南方負海之國魁以治內故陝訾爲中州四戰之國鶉首實沈以負西海其神主於華山太白位焉太梁析木以負北海其神主於恆山辰星位焉案此以五緯及中宮斗乘言分野春秋時於五緯但言歲星未聞五岳九州分配五星此蓋後起之說耳晉之疆候



在辰星占於參罰而一行以實沈與太白相配於占  
候又殊矣保章氏辨九州之地所封封域皆有分星  
先鄭舉春秋傳參爲晉星商主大火國語歲之所在  
則我有周之分野釋之後鄭因詳十二次之分如是  
止矣而賈公彥乃援春秋緯謂辨九州之地指北斗  
所封封域據二十八星強生支離經文九州之地所  
封封域者分天下爲九州州不一國也皆有分星者  
卽指辰爲商星參爲晉星之屬也惟天官書云二十  
八舍主十二州斗秉兼之魁杓共七星而星經言九  
星者劉向九歎訊九魁與六神王逸注云九魁謂北  
斗九星也司馬貞注天官書引徐整長歷云北斗七  
星星間相去九千里其二陰星不見者相去八千里  
王珣注素問云上古世質人淳九星垂明中古道德  
稍衰標星藏曜故星之見者七焉則是合二陰星不  
見者而九然其說與春秋緯又互異正所謂占驗凌  
雜米鹽無足深辨。

### 疆域

府治在布政司西南二百二十里廣輪之數右舒而左  
促。

東西四百二十里南北百里西境南北四百餘里

倚郭汾陽縣

縣境東西百里南北六十五里北至太原府文水縣界五十里東北至文水縣界四十里東至平遙縣界四十里東南至介休縣界四十里南至孝義縣界十五里西南至薛頡嶺寧鄉縣界九十餘里西至黃蘆嶺永寧州界六十里少南至寧鄉縣界八十里西北至交城縣界百二十里

汾陽縣東與平遙分界大抵以汾水爲限而汾陽縣境有在數年前汾水故道之東者由汾水西徙故也今汾水行平遙界其境有在汾水之西者由汾水東徙故也西與永寧州分界以西山正脊南行左右分水定其疆域至南接孝義縣則西起薛頡嶺循金沙水而東三十餘里渠北爲汾陽渠南爲孝義以下乃交錯於二縣而汾陽之地孤懸於孝義孝義之地孤懸於汾陽者甚多如智裕一村周二十餘里在孝義縣西南越境殊遠當由自晉至宋分合併省時畫分未清遂相沿至今耳

東八十里平遙縣

縣境東西百一十五里南北六十里北至太原府文水縣界二十里東北至太原府祁縣界二十里東至

麓臺山祁縣界七十里東南至沁州武鄉縣界六十里南至沁州沁源縣界四十里西南至介休縣界三十里西至孝義縣界萬戶堡四十五里西北至汾陽縣界四十里

東南七十里介休縣

縣境東西八十里南北七十里北至孝義縣界二十里東北至平遙縣界五十里東至平遙縣界六十里東南至關子嶺沁州沁源縣界六十里南至沁源縣界五十里西南至平陽府靈石縣界四十里西至靈石縣界二十里西北至孝義縣界二十里

南少東三十五里孝義縣

縣境東西百九十里南北三十五里右舒而左促北至汾陽縣界十五里而遙自城東三十里萬戶堡至西北薛頡嶺緣境百二十里與汾陽縣接壤東至平遙縣界三十里其接壤者僅里許東南至介休縣界二十里而近自城南二十里池東北至萬戶堡緣境三十五里與介休縣接壤南至平陽府靈石縣界二十里而遙自西南至正南緣境七十五里與靈石縣接壤西南至隰州界八十里而遙自黃雲山池東南緣境八十里與隰州接壤西至石樓縣界百六十里



其接壤者亦僅里許西北至寧鄉縣界百里而遙自薛頡嶺至正西黃雲山緣境八十里與寧鄉縣接壤孝義縣與寧鄉分界北自薛頡嶺至盤重原山屬孝義山西屬寧鄉自盤重原而西則以北面高山爲界山屬寧鄉山南屬孝義西與石樓以黃雲山脊爲界縣南柳壁以西則以南面高山爲界山屬靈石隰州山北屬孝義東南與介休縣當循汾水爲界而介休之南橋頭南嶺北諸村今皆在汾水之右蓋水道東徙故耳又卜家莊一村周十餘里孤懸於隰州境內須越境而治似由元至元三年割隰州溫泉縣之半入孝義畫分未清也

此四縣者汾水行乎其間

平遙之西孝義之東介休之北及西爲今時汾水所經其故道自汾陽縣韓家橋以上西岸爲汾陽東岸爲平遙

西北三百二十里臨縣

縣境東西百八十里南北百七十里北至太原府興縣界八十里東北至一箭嶺靜樂縣界百三十里東至連枝山永寧州界七十里東南至霍家嶺永寧州界七十里南至馬頭山永寧州界九十里西南至永

寧州界百二十里西至黃河百一十里隔岸爲陝西榆林府葭州界西北至興縣界紅石灘百四十里臨縣之山後所越永寧北境而與交城靜樂界故東北至一箭嶺百三十里據山後所言也。

西少北百七十里永寧州。

州境東西二百里南北二百五十里北至赤堅嶺太原府嵐縣界二百二十里東北至太原府交城縣界百四十里東至劉王岬交城縣界百里東南至黃蘆嶺汾陽縣界百有五里南至寧鄉縣界三十里西南至伏鹿山寧鄉縣界百一十里西至黃河百里隔岸爲陝西綏德州之吳堡縣西北至磧口鎮臨縣界百一十里至馬頭山臨縣界四十里。

西百四十里寧鄉縣。

縣境東西二百二十里南北百七十里北至永寧州界二十五里東北至永寧州界八十五里東至汾陽縣界六十里東南至孝義縣界七十里南至石樓縣界百四十五里西南至石樓縣界百二十里西至黃河百六十里隔岸爲陝西吳堡縣界西北至永寧州界百三十里。

寧鄉縣之軍鋪灣實孤懸於永寧州境內故西北百

三十里據軍備清言也

西南二百五十里石樓縣

縣境東西百六十里南北百一十五里北至寧鄉縣界七十里東北至寧鄉縣界四十里東至孝義縣界鳳尾村七十里東南至隰州界五十五里南至隰州界四十五里西南至隰州之永和縣界四十里西至黃河九十里隔岸爲陝西綏德州之清澗縣界西北至寧鄉縣界四十五里至綏德州界百一十里

此一州三縣皆西距河環府界太原府之興嵐靜樂交城文水祁沁州之武鄉沁源平陽府之靈石隰州及所轄之永和河西爲陝西榆林府之葭州又綏德州及所轄之吳堡清澗自府治達京師千三百八十里



汾州府志卷之三

山川上

府境之山以汾水分東西西山自寧武府五寨縣南六十里蘆芽山迤邐而南在府屬臨縣湫水之右者曰紫金山東南距縣治四十里西麓之谿澗四西入黃河東麓之谿澗三東入湫水皆山夾水澗悉紫金山枝麓也山勢嵯峨時有雲氣

山舊建聖水殿殿左右壁間有穴二大纔容手相去二尺許西曰雨穴東曰風穴風穴閉不敢啟雨穴值旱禱手探得水卽雨或偶探之時獲水珠鈿石諸物

曰鳳凰山在城西南一名長壽山鳳凰山之陽龜山之陰

有湖名牛湖二山之脈北連紫金山

臨縣南十里曰白弼崖懸崖百尺上有佛字縱橫三尺似聖書然志稱舊說佛音弼爲佛盼佛時仔肩之佛縣南五十里曰三交南山相傳北魏孝文帝過此見有異氣遂鑿斷來脈建廟壓之時荆棘胷衣怒折其刺至今此地棘刺獨無勾爲異此二山皆在湫水之右

湫水之左曰赤饩嶺今呼赤堅嶺西南距臨縣治七十里魏書尒朱兆傳大掠并州城內獻武王進討之兆遂走於秀容王又追擊度赤饩嶺破之衆並降散山與永寧州接境南距州治二百二十里其北爲嵐縣界在縣南九十里一名離石山離石水所導源也南流轉西入於黃河

離石水之右湫水之左以南曰大小連枝山西距臨縣治七十里山下有湖名喬子川西入湫水

曰黃龍山西距臨縣治五十里有谿湖西導者二入於湫水

曰漢高山西北距縣治五十里山下有湖名大峪水西

入湫水山與永寧州接。南至州治百一十里。史記韓王信列傳。高帝七年。信亡走匈奴。匈奴使左右賢王將萬餘騎與漢兵戰。漢大破之。追至離石。匈奴復聚兵樓煩西北。漢令車騎擊破匈奴。山上有高帝廟。下有祠曰仙姑祠。相傳三宮嬪葬焉。非所詳也。

曰雲山西北距臨縣治三十餘里。山下有澗名小峪水。西入湫水。

臨縣東四十里曰中腳山。產石炭。縣東南八十里曰招賢山。有鉄冶。產石炭。土人造磁器。曰火山。曰樊包頭山。並出石炭。土人造磁器。此四山皆離石水以西。湫水之左。在臨縣境者。

曰積翠山。南距永寧州百四十里。金史地理志。石州方山縣。貞祐四年。徙治於積翠山。是也。今俗呼方山嶺。曰馬頭山。東南距州治三十里。相傳晉豫州刺史祖逖嘗駐軍此山。有廟碑。

曰興雨山。東南距州治二十里。有雲繞是山。則雨隨之。其山三峰秀舉。以狀類。俗呼筆架山。

曰區斗山。東距州治十五里。山高插天。傍有岩曰叶斗岩。其下泉名靈通。月窟泉。山上有舊寨廢址。俗呼安國王寨。



曰南山東距州治百二十里山在故孟門縣之南其頂有泉名靈泉高崇熙靈泉寺記云南山峰巒插天下臨黃河有泉一道飛瀑山椒澌泐殿宇導流齋廚旱取水禱之輒應金大定間於茲灌水入田嘉禾合穎

曰馬岩山東距州治百里有泉資灌溉

州北五十五里曰石版門山崖壁陡峻山半有穴如兩扇開闔狀州西二里小山曰虎山高百步州西九十里曰八盤山此三山皆離石水之西在永寧州境者

離石水之左曰步佛山南距州治百六十五里宋史王忠植傳云叛將趙惟清執忠植械詣其右副元帥撒離曷不能屈使甲士引詣慶陽城下諭使降忠植大呼曰我河東步佛山忠義人也爲金人所執使來招降願將士勿負朝廷堅守城壁忠植卽死城下

曰孝文山南距州治百七十里與交城縣接境在交城縣西北

百六十里高四十里上無林木每雨則山半雲凝有北魏孝文帝碑長丈餘廣五尺許文字剝落其谿澗東導逕文谷是爲文水會於汾川

曰呂梁山西南距州治百三十里與交城縣接境在交城縣

西北百五十里高插霄漢俗呼骨脊山鄙語云舊傳山半有蛤

蓋及繁州鉄鑄少東曰鉄鑄山舊傳有鉄環並非所詳  
究也山有漢劉歛碑可辨者六十字言舜禹治水時事  
山頂有小廟刻記至元年號水地記圖注曰禹貢冀州  
旣載壺口治梁及岐舊說云壺口在冀州梁岐在雍州  
從東循山治水而西蘇子瞻云梁岐二山在雍州今於  
冀言之者因河而言非以二山爲冀州之地也曾彥和  
云壺口梁岐一役也其施皆同時不可分言於二州故  
併言於冀也王伯厚困學紀聞云治梁及岐若從古注  
則雍州山距冀州甚遠壺口太原不相涉晁以道用水  
經注以爲呂梁狐岐晁氏王氏之說是也考禹貢之文  
自西而盡於東故先壺口次梁岐次太原岳陽次覃懷  
次衡漳或舉山或舉地梁岐之西水歸於河梁岐之東  
水歸於汾此二山爲汾川以西羣山自北而南之脊舉  
之以見汾西河東其地就治而太原則見汾東之地就  
治岳陽在汾東沁西覃懷則沁東而南近河衡漳則漳  
水過臨漳而入河北注觀此數語冀州所宜治者全具  
於是不得謂因壺口一役兼及河西雍州也况韓城之  
梁山雖近河而渭北之岐山遠隔在漆沮涇水之西誠  
使越漆沮涇水至乎岐下則雍州自渭以其所當治者  
幾於備舉又於雍州言涇屬渭洎漆沮既從荆岐旣旅

此三語爲禹貢先分九州後復統記山川分者定其疆域合者見其條貫獨於發端之始以雍州山隸冀州何取乎先分後合示人以截然有限域者而寔涓涓其間也然謂禹貢梁岐卽今永寧州之呂梁孝義縣之狐岐者亦有未盡如淮出桐柏渭出鳥鼠後人舉其枝山曰淮出胎簪渭出南谷蓋古者統以一名後人往往隨地殊稱今考孝文呂梁劉王暉諸山寔一山之所盤迴薛頡狐岐高堂玉泉諸山亦一山之所盤迴禹貢之梁岐統名也今之呂梁狐岐特其中之一耳

蔡氏書傳云梁岐皆冀州山梁山呂梁也在今石州離石縣東北爾雅云梁山晉望卽冀州呂梁也呂不韋曰龍門未闢呂梁未鑿河出孟門之上又春秋梁山崩左氏穀梁皆以爲晉山則亦指呂梁矣酈道元謂呂梁之石崇竦河流激盪震動天地此爲禹旣治壺口乃治梁也岐山在今汾州介休縣狐岐之山勝水所出東北流注於汾酈道元云後魏於狐岐置六壁防離石諸胡因爲大鎮今六壁城在勝水之側寔古河運之險阨二山河水所經治之所以開河道也先儒以爲雍州梁岐非是閻百詩尙書古文疏證云壺口在今吉州西七十里與河津縣西北三十里之



龍門相連與渭河之梁山對峙公羊傳梁山河上山穀梁傳梁山崩壘過河三日不流經文遂連類而書寔有出於某州某山常例之外者又元和志京兆府奉天縣有梁山今乾州西北五里之梁山是也志言山卽禹貢治梁及岐周本紀古公亶父踰梁山止於岐下及秦置梁山宮皆此山蓋山勢紆迴扶風岐山二縣之境經凡云及皆相近之辭以梁山屬此說亦可通岐山在今岐山縣東北十里縣在鳳翔府東五十里志稱府居四山之中五水之會五水汧也渭也漆也岐也雍也岐水入漆雍水合漆水入渭汧水漆

水各入渭

此別一漆水非禹貢之漆沮

應是治此羣水注渭耳胡

臚明禹貢雖指云治梁所以終壺口之事除河患也其遂及岐者何蓋治梁已畢若身遽渡河而東則東方之事正多不能速還治雍當在數年之後而梁岐之間其於帝都事勢當日必有甚切而不容緩者故治梁之餘乘便施功及岐而止又洪水初平艱食未奏冀田僅第五等而梁岐之間去帝都最近田旣膏腴轉輸又便禹甸梁山之野通渭水之漕其爲帝都艱食計也切矣及岐而止者蓋岐西地高甲洪水不爲災而東方事急亦無暇西畧故也案蔡氏說本晁

以道而... 蔡氏更申舊說以梁岐爲雍  
州山夫禹貢先分別九州初非於其間又牽合治水  
之先後緩急也使冀州施功西兼及雍且不啻大半  
治之則南亦可兼及豫東亦可兼及兗豈無相連之  
勢施功同時者乎至推言雍便轉輸論益密而益鑿  
矣百詩於困學紀聞所云距冀州甚遠辯之曰梁山  
與壺口止隔一河耳不得謂甚遠考伯厚之言乃以  
自梁及岐其地連延而西爲甚遠不當偏舉一梁山  
議其語有滲漏百詩肅明皆深於考訂者咸謂蔡傳  
爲非固失在蔡氏不在見以道蔡氏一引爾雅左氏  
穀梁證晉山宜屬冀州不知春秋時自魯文公十年  
晉人伐秦取少梁梁山由是入晉迨後三晉旣分自  
河以西濱於洛猶屬魏地少梁之梁山寔河西大山  
故晉望祭之列國望祭山川及晉河東望祭之山爾  
雅絕不一言而獨曰梁山晉望也正以河西近秦故  
特言之成公五年梁山崩壅遏河三日不流晉君召  
伯宗而問焉皆非離石縣呂梁一引呂覽語出口子  
淮南鴻烈亦襲之所稱呂梁未鑿雖後人失其所在  
而離石縣之呂梁西距河百五十餘里隔越重山不  
濱於河無事疏鑿也一引酈道元水經注其本文云

河水左合一。故城西南八十里。西流歷於呂梁之山而爲呂梁洪。其巖層岫衍。湖曲崖深。巨石崇竦。壁立千仞。河流激盪。濤涌波襄。雷奔電洩。震天動地。昔呂梁未闢。河出孟門之上。蓋大禹所闢以通河也。司馬彪曰。呂梁在離石縣西。今於縣西歷山尋河。乃無過岨。至是爲河之巨嶮。卽呂梁矣。在離石北以東可二百有餘里。後人以保德州西天橋峽爲道元所謂呂梁洪。就水經注自北而南之次考之。地望適協。其地有禹鑿之跡。河自故東勝州境轉而西南流八十里。至河曲縣西北。轉而西流九十里。逕天橋峽。下至保德西五十里。折而南。逕興縣西。又南百七十里。至臨縣界。道元言呂梁洪在離石北以東可二百餘里。蓋據黃河至離石縣界爲言。因西流乃轉南。故曰以東。其指天橋峽無疑。司馬彪言呂梁在離石縣西者。卽今永寧州東北之呂梁。徒因離石縣有呂梁山。而河行離石之西。故云在縣西。寔未深考之。言道元引而辯之。則以離石西界。河無過岨。故溯流而上。以求其地。是道元以尸子呂覽淮南所言呂梁不在離石而遠在其北也。蔡氏授以證呂梁在離石。正與其說相刺謬。一言岐山在介休縣。取山海經狐



岐之山勝水出焉而東北流注於汾水者綴其下  
引酈道元水經注按之本文乃云勝水西出狐岐之  
山東逕六壁城南魏朝舊置六壁於其下防離石諸  
胡因爲大鎮勝水又東合陽泉水又東逕中陽故城  
南又東合文水文水又東南入於汾是山海經水經  
注之狐岐在今孝義縣西宋熙寧五年省孝義入介  
休元祐元年復置孝義至蔡氏時已爲金地無所廢  
置當據元祐以後言在今汾州孝義縣不當據前此  
熙寧元豐十餘年間繫之介休也若介休東南洪山  
俗以爲狐岐其泉源俗亦呼爲勝水則又隔越汾水

其下言今六壁城在勝水之側寔古河逕之險阨二  
山河水所經治之所以開河道也意以六壁城爲防  
守西來渡河而東之津要不知北魏初河東岸離石  
吐京之地萬山簇擁悉匈奴五部餘衆所居憑恃山  
險未能卽平至狐岐以東汾川左右地勢平坦連接  
太原本漢太原郡地故於此置六壁立爲鎮戍以防  
狐岐以西黃河以東山寇西距黃河三百餘里不可  
謂爲河逕之險阨吕梁狐岐之西始爲今臨縣永寧  
州寧鄉縣山在三州縣之東而曰河水所經治之以  
開河道將置此三州縣峻峯鉅嶺萬山簇擁者於何

地乎。

曰勒臺山西南距州四十里相傳石勒嘗屯兵於此  
曰伏盧山西距州治二十餘里五朝志修化縣有伏盧  
山是也北周大象中置盧山縣因是山以名隋大業初  
省入修化。

曰雲鳳山南距州治二里高百步山有古墓相傳陳希  
夷墓非所詳究也華山之希夷峽舊傳希夷葬處矣。

自呂梁山迤而東南曰劉王嶂西少南距州治百里高  
八里盤踞二十二里上有池曰飲馬潭劉淵都離石時  
嘗居此故名其左右谿澗右澗爲州之東川入離石水

以達河左澗入文水以達汾山之東麓接交城縣界

在

城縣西百自是而南左右汾陽永寧之間西山之正脊  
也。

山脊之右曰拓拔嶺西距州治七十里山下有泉曰馬  
跑泉上有古塚相傳北魏孝文帝陵也無可證實。

曰寶豐山西距州治六十里巉巖壁立亦呼尖山有巨  
石袤丈餘狀類龜一人踐之則動衆相與踐之則否俗  
傳以爲異。

循山脊而南曰黃櫨嶺東距府治六十餘里西少北距  
永寧州治百有五里或言卽魏書序紀稱將從西河鑿

谷南出者也。未聞其審。

吳城驛水之左以南曰九鳳山。山西距州治五十里。有石洞曰白馬洞。入里許。有獨木橋。飛石燕。直下有梯。偃仰旋轉而進。忽寬。廠如屋。怪石萬狀。又進。有圓石。自頂倒懸。去地三尺許。名石鐘。擊之鏗然有聲。又進。得池二。一色白。曰白龍池。一黑如墨。曰黑龍池。又一池曰蓮花池。頂上水滴。垂垂而下。祈禱獲以入瓶。輒應。又進。其穴九道。岐分。深不可測。相傳見一白馬。日食田禾。逐之入洞。蹠跡猶存。殆如廣武之馬蹠谷。天馬徑矣。古碑云。九鳳山黃帝之別宮。又一碑云。赤松子煉丹之所。非所詳也。

洞前爲唐貞觀中尉遲敬德監造廟殿。洞口時吐雲霧。晉高祖禱雨而應。天福元年。詔封淵濟仙洞。勅樞密使桑維翰書額。山與望仙坡對峙。坡俗呼韓仙山。掌相傳東萊韓中元往來是坡。採蒼朮黃精服之。身輕。曰龍山。卽州治南山。高一里。山徑盤紆。下有神醫華陀廟。其井泉名華君井。病者祈禱取水。

州北百九十里。曰龍慶山。上有佛寺浮圖。俗傳尉遲敬德所造。呼爲尉遲塔。州北百六十里。曰三掌崖。三峰插天。明晉藩牧地在其下。土人呼官地裏。州北百二十五里。曰銅柱山。高千仞。山半有涌泉。上有寺名。



迎曦寺州北百一十里曰龍王山土人呼爲北頂有  
龍王廟州北百一十八里曰黑龍洞山有鉛礦上有  
黃帝廟州東北七十里曰龍神山多五色石質溫潤  
東北三十里曰胡公山此七山皆離石水之左在永  
寧州境者州東南五十里曰尖陽山上立堡以備警  
山之東與寧鄉縣接境在縣東北三十里有泉西流入寧鄉  
水

山脊之左枝麓岐分在汾陽縣境者曰謁泉山南距府  
治四十里隱泉水出焉東入文水水經注曰俗云暘雨  
愆時是謁是禱故山得其名非所詳也其山石崖絕險  
壁立天固崖半有一石室去地可五十餘丈爰有層松  
飾巖列柏綺望惟西側一處得歷級升陟頂上平地一  
十許頃括地志謁泉山一名隱泉山在汾州隰城縣北  
四十里考北魏太和八年置西河郡治茲氏城茲氏本  
漢太原郡之屬縣也後人緣名傅合莫能稽遠遂以爲  
子夏居西河教授跡在於斯故是山俗呼子夏山禮記  
檀弓篇曾子稱退而老於西河之上鄭康成云西河龍  
門至華陰之地蓋河上據河而言不指郡縣張守節始  
舉西河郡謁泉山石室引隨國集記云此爲子夏石室  
退老西河居此有卜商神祠李吉甫元和郡縣圖志汾

州西河縣下云... 在縣北四十里方道元作水經  
注時西河郡治咸知新在此地故言子夏設教但求之  
夏陽邵陽間河水篇注云岍谷水東流側谿山南有石  
室因阿結廡連扃接闔昔子夏教西河疑卽此也而無  
以辨之谿水又東南逕夏陽縣故城北東南注於河陶  
渠水東南逕漢陽太守殷濟精廬尙在俗謂之子夏廟  
其水又東南逕夏陽縣故城南又東南入於河徐水東  
南逕子夏陵北東入河河水又南逕子夏石室東南北  
有二石室臨側河崖卽子夏廟室也道元所記者如是  
而於謁泉山及汾水文水絕不涉及明此地距河遠無  
庸傳合耳沿及隋唐習聞郡名不復責實卜子之跡在  
龍門西河者移而虛加之北魏以後西河郡矣

曰青龍山東南距府治四十里孤峰特立羣山環之左  
右谿澗流出山頂有泉曰甘泉

曰白彪山東南距府治二十五里相傳遠古騶虞見於  
此山白虎黑文其麓曰壺盧谷原公水出焉東南入文  
水谷有龍橋洞方廣十丈許闔兩巖間石梁橫續懸溜  
滴池不絕南爲羊耳山石巉峰聳林茂泉飛水經原公  
水出茲氏縣西羊頭山或云白彪山卽羊頭山之異目  
也今別有山名羊頭山土山載石東距府治十五里原

公水經其下

曰比干山東南距府治百餘里元和郡縣圖志西河縣比干山在縣北百一十里是也

黃櫨嶺之東曰向陽峽東距府治三十五里古金鎖關在焉巖險插天中斷如闕延袤三十餘里有澗水出峽東流入文水

曰鶴鳴洞東南距府治十里舊曰西岩古洞

曰石室山東距府治三十里山多巖洞

舊志云石室山有空王佛岩麻衣仙洞空王佛後化介山故今以抱腹巖爲東岩而以此爲西岩麻衣仙

姑汾州任氏女碑記稱生於唐貞觀元年七月廿有六日不願婚嫁披麻衣入洞中因以名其洞旱禱輒應

曰萬戶山東距府治二十里高八十丈延袤二十里頂平曠又謂之西岡舊傳趙所封離石侯石嵩葬此山下今無可考

曰石盤山東北距府治十里其高峯俗呼西頂

曰將軍山一名柏山東北距府治十七里舊傳離石侯牙將趙鼎號白馬將軍戰死此山民收葬山下故名山與石盤山相連



府治西三十里曰石梁神山相傳山無水泉有老嫗  
日遠汲以濟人沒而爲神建祠山上其山與萬門山  
相連府西五十里曰柏山此二山皆山脊之東在汾  
陽縣境者

西山之正脊南行盤踞汾陽孝義寧鄉三縣境者曰薛  
頡嶺高五里許東北距府治九十餘里西距寧鄉縣治  
五十里東南距孝義縣治百里善利渠金沙水俱導源  
是嶺東入文水其西澗谷之水西入寧鄉水

自黃櫨薛頡而南其西麓止於寧鄉水之東曰寧陽山  
南距寧鄉縣治二十里俗呼朱店山縣境皆山惟北抵  
永寧州爲平川是山乃諸水之屏障

曰蕉山西距縣治三十里山下有泉曰蕉泉隱見不常  
值歲旱則大涌而出縣境耕山爲田灌溉所不及惟恃  
雨澤故土人不樂是泉通流

曰柏窰山西距縣治十里有二泉冬夏不增減清冽味  
甘可以已疾

曰卧龍岡西距縣治一里山勢委婉舊時多林木

曰泉子山西北距縣治三十五里崖臨寧鄉水之阨有  
二泉自南崖下涌出

曰樓子臺山西北距縣治三十二里山勢叠峻望之若

層樓然山有洞高八尺廣二丈深二十餘丈曰劉公洞  
塑像洞內寧鄉水逕其西

曰蜜蜂崖西北距縣治三十里壁立如削寧鄉水逕其  
下

曰仙明山西北距縣治十里山下有洞深不可測曰仙  
明洞禱雨輒應

曰鷹嶺北距縣治二里許俗呼虎頭山寧鄉水環繞其  
西而北

寧鄉縣東六十里曰黑嶺縣東南十里曰百家峪縣  
東南三十五里曰黃嵩嶺此二山皆在山脊之西寧

鄉水之東屬寧鄉縣者

薛頡嶺之左曰龍隱山東南距孝義縣治六十里巒壁  
巍峩高三里許一名龍山其東南麓谿澗名賈壁水南  
麓谿澗名版峪水皆東北入金沙水

山西通志云隱龍山有象王峰蓮花峰雲蓋峰金沙  
河半月池諸勝

與薛頡嶺連岡而在南曰狐岐山晁以道釋禹貢治梁  
及岐謂冀州之岐山卽此山也東距縣治百里高七里  
許其南麓有原曰盤重原原東谿澗俗呼孝河北川者  
也東入勝水

孝義縣新志云薛頡跨汾陽寧鄉  
孝義三縣之界狐岐則全在孝義境內山西通志誤  
云狐岐一名薛頡

由盤重原左轉其旁起者曰白雀山東距縣治七十餘  
里山有池土人呼黑龍池其東曰烏雞山東距縣治六  
十餘里斜坡東下行三十里許而盡山亦有所謂黑龍  
池者池上有廟官民禱雨則於此

與白雀山連岡而在南曰高唐山東北距縣治七十餘  
里其南麓谿澗俗呼孝河南川者也唐書地理志武德  
二年置高唐縣貞觀元年省然則是山蓋唐初高唐縣  
境

與高唐山連岡而南池東曰玉泉山高三里東北距縣  
治六十餘里山之東北麓勝水出焉東北入文水俗呼  
左水者也其東麓球谿之水出焉南麓則漕谿之水出  
焉並東北入勝水自薛頡至玉泉寔一山之高下盤屈  
古通謂之狐岐山故山海經稱狐岐之山勝水出焉而  
東北流注於汾水若今之所謂北川乃東南而非東北  
亦惟左水逕六壁南若南北二川則合而逕六壁之北  
水經注可證也然山海經言注汾而水經注言注文水  
則因汾水東西轉徙驗之近事數年以前原公水以下



諸澗皆自達汾川不與水經注協今則皆入文水一如道元所見矣。

由玉泉山岐分東迤北曰柏山東距縣治五十餘里峰巒峭拔一名金斗山勝水逕其陽高唐山之水逕其陰自玉泉山迤南則爲靈石縣北山東盡於汾之西岸

盤重原之西循岡阜迤邐而南地名弓家灣山之正脊也。在縣西南百四十三里。左有澗東南由隰州至靈石縣入汾右

有澗自遠望山東南麓而來西爲寧鄉水又南枝麓岐分而西者曰可寒堆卽遠望山也俗呼上殿山高十里許東北距縣治百六十里自山而西北八十里至寧鄉縣治寧鄉水導源山之谿澗峰巒峻拔山有可汗廟元和郡縣圖志溫泉縣遠望山一名可寒堆在縣西七十里周廻九十五里。

孝義縣西南百二十餘里白家莊諸村之山自弓家灣迤邐而來東行起橫岡鉅坡高出柏山高唐玉泉諸山之上南北縣衍二十餘里東西四十餘里山高巒複村庄稀少故山盡無名山北有谿澗西自弓家灣北導源東流三十里繞山而南經隰州靈石入汾山南有谿澗西自隰州北境野高泉導源東流四十里復入隰州界又南有澗自黑龍溝導源東流十餘

里亦經臨州合野高泉之水歸汾山西有谿湖南自  
上殿山東南麓導源經弓家灣南而西流入寧鄉縣  
界歸黃河此弓家灣而南白莊村諸山之西爲西山  
正脊所過之大致也上殿山之旁曰佛寶山上有積  
石瑰琦駭目寔連於上殿山一石崖耳

寧鄉水之西曰雲集嶺北距寧鄉縣治六十五里縣之  
鎮山也

曰八道岡東北距縣治五十五里循山之西谷至煖泉  
鎮其東澗谷有泉流合車轍泉

曰車轍山北距縣治三十七里有泉東入寧鄉水

曰車鳴峪西北距縣治三十五里有泉而微細合八道  
岡車轍山之泉入寧鄉水

曰避兵臺北距縣治四十里高千丈周盈三里一名沒  
虎臺下有清泉石室

曰屏風山北距縣治三十一里寧鄉水逕其下壁崖峭  
舉展舒如屏

曰鳳凰山卽寧鄉縣城所倚西山也跨山爲城

曰仙童山在永寧州境東北距州治四十餘里有石洞  
洞曰廣丈餘少進旁有一穴纔容身俯偃乃入復開廠  
內石牀一泉一甚清冽相傳昔時見童子晨樵採夕入

是洞故山以名。洞口之上有廟曰應雨龍神廟。  
曰石門山。東北距縣治百四十里。黃河逕其西。煖泉鎮  
之水逕其南。

曰柏林山。東距縣治九十里。一名鳳翅山。鋤溝鎮南山  
也。北臨澗水。山多古柏。有松一株。

縣西十里曰天原山。縣西南九十里曰寨溝山。此二  
山皆在寧鄉水之西。黃河之東。屬寧鄉縣者。

寧鄉石樓二縣。山之正脊盤旋其東。右枝岐分。迴環北  
轉。故二縣之水皆北流。屈西以歸黃河。蓋山勢使然也。  
介於孝義石樓之間曰黃雲山。東距孝義縣百六十餘

里。西距石樓縣七十里。二縣以山脊分界。自黃雲山崖  
正北至寧鄉縣治九十五里。崖  
壁峭舉。風氣寒冽。

其西曰石羊山。西距石樓縣治二十里。山多栝木。一名  
栝木山。下有小澗。來自縣東五十里。西入龍泉水。

與黃雲山相連而在南曰牛心岡。西距縣治六十里。  
其南曰石樓山。西北距縣治六十里。元和郡縣圖志云。

開皇十八年。改吐京爲石樓縣。因縣東石樓山爲名也。  
石樓山在縣南六十里。

龍泉水之西曰翠金山。北距縣治三里。巒聳林密。一名  
臺駘山。上有臺駘廟。



曰燉泉坡東北距縣治四十里溫泉川出焉東北入  
泉水

曰九重山東距縣治七十里山下有泉俗呼馬剖泉宋  
呼延瓚故里在焉有巖曰金甲巖俗傳呼延瓚於此得  
甲故名

曰石鼓山東距縣治三十里有平石二二似琵琶一類  
鼓形

曰老子岩東距縣治二十里岩上清泉滴瀝冬成冰柱  
高四丈有奇

曰團圓山東南距縣治五十里山峰高舉有漢高祖廟  
半坡有泉可資灌溉太平寰宇記土軍故城在團圓山  
下今無復遺蹟

曰飛龍山東南距縣治五十里山崖峻疊

以上右河左汾諸山在臨永寧汾陽孝義寧鄉石樓  
六州縣界中者

汾東之山自寧武府治西南四十里分水嶺地遶布分  
東南至樂平縣西沾嶺右轉歷八賦嶺侯甲嶺至府屬  
平遙縣之東曰盤石山西距縣治六十里有潞湖北流  
二十餘里散於原野

曰鹿臺山西北距縣治五十里嬰澗水出焉西北入侯

甲水今其水西北流散於原野。鄭道元以山海經謂  
之山嬰侯之水當之。文獻通考汾州平遙縣下云有鹿  
臺山。有嬰澗水。劉暉遊鹿臺山記云。山無林木。衆壑參  
差。千岩一色。頂上方石平置。纍纍如九層臺。鹿臺得名  
或以此峰。

曰過山。西北距縣治四十五里。魏書地形志太原郡平  
遙縣下云。有過山。是也。過讀如戈。魯澗之水出焉。西北  
流二十餘里。散於原野。其西爲戈嶺。有谿澗。東北入侯  
甲水。

曰超山。西北距縣治四十里。鹿臺山以西至此。皆古過  
山也。超山之名起於唐天寶六年。以水經注證之。山卽  
汜山矣。其谿澗北入過嶺水。山有元遺山題名石云。已  
亥秋八月十有四日。自太原道往山陽。留宿於此。東山  
元好問裕之題。溫仁甫有後序。

曰天峻山。西北距介休縣治六十里。壁立萬仞。雲繞山  
半。其下雖雨而巔或無雲。

曰東洪谷。西北距縣治四十里。頂有泉。曰懸泉。瀝石下  
注。似瀑布。岩下有潭。名白牛滋。山路險峻。直上三十里。  
始達於法。爲潭者凡三。周五百餘步。深不可測。禱雨輒  
應。其西曰西洪谷。西北距縣三十里。

山西通志平遙縣洪谷在縣西南有白龍潭又引武亮記谷上通絳山兩崖對峙壁立千仞巨潭天威鏡若明鏡此所謂洪谷卽介休縣之東洪谷耳非平遙境

曰盤簇山西北距縣治三十里山勢高峻以狀類故名曰洪山西北距縣治二十五里有泉曰鸞鷲泉資溉甚溥山卽絳山之隨地異名者俗以爲狐岐山非也

曰絳山北距縣治四十里遞高四十里有岩曰抱腹岩羣峰簇擁絳山之奧也岩西曰鉄索嶺援攀乃登自嶺而西至白雲洞土人呼爲中岩泉出崖壁間其孔百餘

狀若蜂窠名蜂房泉又有泉出下岩名下馬泉山勢絳亘東抵沁源北接介休南跨靈石隸介休境者二十五里以山脊界分其陽屬靈石其陰屬介休說者皆援介子推事實之故又名介山左氏春秋言子推之隱不著其隱於何所但曰遂隱而死晉侯求之不獲以絳上爲之田曰以志吾過且旌善人遂隱而死者舉其終之不可得言之求之不獲者隱固不復使人知也安知其隱必猶在晉國中乎晉侯以絳上爲之田其地不出國中之地或介推曾有子則授之其子或令人立其祠取租稅供祭事而已史記則曰至死不復見介子推從者憐



之乃懸書宮門文公出見其書曰此介子推也吾方  
王室未圖其功使人召之則亡遂求所在聞其入緜上  
山中於是文公環緜上山中而封之以爲介推田號曰  
介山在左氏無所謂介山也曰以緜上爲之田則地名  
而非山名史記增成之曰緜上山中且以所封之田爲  
其所隱之處其曰環緜上山中而封之將以爲子推入  
居於此如項羽聞陳餘在南皮因環封三縣之事歟觀  
陳餘後發三縣兵則三縣爲餘有介推未必受此緜上  
山中食其租稅時所謂環封者乃空棄其地歟蓋戰國  
時有抱木燔死之說子長所不取而屈原賦稱封介山  
而爲之禁其語近是故本以爲說耳戰國秦漢之際異  
說紛起無足取信當據左氏之文正之至緜上地又見  
於魯襄公十三年晉侯鬼於緜上以治兵及定公六年  
宋樂祁使於晉趙簡子迎而飲之酒於緜上獻楊楸六  
十於簡子皆地近晉都輿炎武以爲翼城縣西近之爲  
介子推田者亦宜在彼不在此

後漢書郡國志太原郡界休有界山有緜上聚水經

注云于肅喪服要記曰昔魯哀公祖載其父孔子問

曰寧設桂樹乎哀公曰否也桂樹者起於介子推子

推晉之人也文公有內難出國之狄子推隨其行割

肉以饋軍糧。後文公復國，忽忘子推，子推奉唱而歌。文公始悟，當受爵祿，子推奔介山，抱木而燒死，國人葬之，恐其神魂留於地，故作桂樹焉。吾父生於宮殿，死於枕席，何用桂樹爲？余案夫子尚非璠璣送葬，安能問桂樹爲禮乎？王肅此證近於誣矣。顧炎武曰：知錄云：漢魏以來，傳有焚山之事。太原上黨西河鴈門之民，至寒，食不敢舉火，然考之於傳，晉悼公蒐於緜上，以治兵，使士匄將中軍，讓於荀偃，此必近國都之地。又定公六年，趙簡子逆宋樂祁，飲之酒於緜上，自宋如晉，其路豈出於介休乎？况文公之時，霍山以北大抵皆狄地，與晉都遠不相及。今翼城縣西亦有緜山，俗謂之小緜山，近曲沃，當必是簡子逆樂祁之地。又云：今萬泉縣南二里有介山。漢書武帝紀詔曰：朕用是介山祭后土，皆有光應。地理志汾陰介山在南，楊雄傳：其三月將祭后土，上廼帥羣臣橫大河，湊汾陰，既祭，行遊介山，回安邑，顧龍門，覽鹽池，登歷觀，陟西岳，以望八荒。雄作河東賦曰：靈輿安步，周流容與，以覽於介山。嗟文公而愍推兮，勤大禹於龍門，水經注亦引此，謂太康記及地道記永初記並言子推隱於是山，而辨之以爲非，然可見漢時已有二說矣。

案今沁源縣西北十里。有縣上關。縣上城。卽後漢書之縣上聚也。其地在縣山之南。漢晉蓋屬界休縣。後代割入沁源。說者謂介休南山盤踞深厚。是以求而弗獲。若在萬泉者。周圍僅十里。未必不獲。此未察。春秋傳初非言其入於縣上也。二山皆屬傅合。又平定州東北九十里。亦右縣山。山有介子廟。娘子關有茹女祠。以爲子推妹。甘縣山東麓有縣水。北流入澤潞。水喬宇觀縣水詩。西嶺寒流繞澗斜。離離石子帶晴沙。翼城縣西北十五里之縣山。下有介子推廟。志稱土人傳晉文公所立。

曰雀鼠谷。東北距縣治二十里。水經汾水又南過冠爵津。酈道元注云。汾津名也。在介休縣之西南。俗謂之雀鼠谷。數十里間。道隘水左右。悉結偏梁閣道。累石就路。縈帶巖側。或去水一丈。或高五六尺。上戴山阜。下臨絕澗。俗謂之魯般橋。蓋通古之津隘矣。亦在今之地嶮也。考水經注所言谷之隘嶮。今屬靈石縣境。東接介休。爲入谷之口耳。

介休縣東南四十里。曰獅鼻岩。高七十餘丈。縣東二十八里。曰羝城山。縣東南二十里。曰太虛岩。岩畔有數石洞。知縣李鍾盛。介山分界碑記。山南之坡爲陽。



城地名... 廟諸處屬靈石縣地山北之坡爲陰坡地名有... 臺抱樓山陶圪塔優頭山興地村等處屬介休縣地俱以山嶺中脊陰陽爲界下以柏溝村興地村二溝合流總渠水心爲界

汾州府志卷之四

山川下

水利隄堰附見各水下

黃河自朔平府平魯縣西北緣胡山折而南流逕偏關河曲二縣過保德州西天橋峽至太原府之興縣西南紅石灘與府屬臨縣西北百四十里接境又南紫金山西麓之水引澗西導者四以次注於河又南月鏡川水西南流注之又南接永寧州境左得湫水又南逕孟門縣故城西有谿澗東來注之又南左得離石水又南接寧鄉縣境又南爲伏落津津際崖畔古寨宋史平夷縣有伏落津寨者也又南石口泉之水注之又南逕一故

城西俗呼吳王城。趙之中陽故城也。漢爲縣屬西  
郡。以水經考之。中陽值離石之南。土軍之北方。秦趙相  
攻時。秦在河西。趙守險以禦秦。宜於是間矣。而久失其  
傳。莫能證實。又南逕三交原。西又南逕石門山。山西又南  
煖泉鎮之水。西北流注之。又南接石樓縣境。左得龍泉  
水。河行府境之西。凡四百六十里有奇。自府境又南逕  
隰州之永和。大寧二縣。西過孟門山。又南過吉州西南  
七十里壺口山。又南逕鄉寧縣。西過絳州之河津縣。西  
北二十五里龍門山。又南合汾水。逕蒲州府之榮河。臨  
晉。永濟三縣。西抵華陰潼關。是爲禹貢所稱龍門。西河  
三受降城之南。平魯偏關之西。所謂河套者也。河套  
之地。北濱黃河南。抵榆林府及延安府之靖邊定邊  
二縣。北邊牆。東西阻河。今鄂尔多斯左右翼六旗居  
之。而河曲保德興與陝西府谷神木二縣分河。臨永  
寧寧鄉石樓與葭州吳堡縣綏德州清澗縣分河。永  
和大寧與延川延長二縣分河。吉寧鄉河津與宜川  
韓城二縣分河。榮河臨晉永濟與郃陽朝邑華陰三  
縣分河。

臨縣黃河上接興縣界。紅石灘磧。歷葭蘆磧。烏龍磧。  
翻入坪磧。大同磧。下接永寧州界。行百八十餘里。永

寧州黃河上接永寧州界下接寧鄉縣界行六十餘里  
寧鄉縣黃河上接永寧州界下接石樓縣界行四十  
餘里石樓縣黃河上接寧鄉縣界下接永和縣界行  
百八十里黃河津渡臨縣馬家窰渡對葭州大會村  
其南曰高家灣渡次南曰克虎寨渡對葭州東水門  
底古置浮橋其南曰杏林莊渡西南對葭州浮屠峪  
其南曰曲峪鎮渡其南曰白道峪渡西南對葭州關  
溝其南曰郭家塔渡對葭州荷葉坪其南曰堡子峪  
渡對葭州螞蚶峪其南曰高家塔渡對吳堡縣川口  
鎮其南曰索達干渡其南曰小園子渡其南曰橋子  
溝渡對吳堡縣橫溝村永寧州曰郝家津曰軍鋪渡  
並對吳堡縣曰青龍渡對綏德州寧鄉縣曰三交口  
渡對綏德州石樓縣曰上平津對綏德州

臨縣紫金山西麓一澗西流八十里逕第八堡入黃  
河俗呼第八堡河次南山麓岐分其一池邏三十里  
地名流泉溝有澗西流二十里逕兔兒坂又西南四  
十里逕杏林莊入黃河俗呼杏林莊河其一池邏二  
十里地名張陽會有澗西南流六十里逕曲峪鎮入  
黃河俗呼曲峪河山之西麓少南一澗西南流九十  
里逕叢蘿峪入黃河俗呼清涼河皆資灌溉



月鏡川水出縣西北二十五里西南流八十餘里逕索  
達干入黃河俗又呼孝才河資溉蔬圃

孟門故縣水自永寧州西七十里雷家溝西流十里  
逕南坡村又十里逕柳家莊又十里逕馬家塌又十  
里逕孟門故關入黃河

湫水出興縣東南八十里合查山水經注之陵水也西

南流逕臨縣東北白文鎮南又西南一泉自左注之俗呼

郝家又西南逕臨泉故城東故縣水自右注之又南左

則有泉東出石巖下注之俗呼小右則紫金山東北麓

之水引澗東導者二並東流二十里注之一澗俗呼窰

澗俗呼又南連枝山之水曰喬子川西流四十里注之

又南紫金山東麓之水東南流三十里注之俗呼萬又

南黃龍山西北麓之水曰榆林溝西流四十餘里注之

又南有泉導源縣西北里許曰暴水泉東流八里注之

又南逕縣城東右則牛澗之水注之左則甘泉溝水西

流五里注之又南黃龍山西南麓之水西流二十五里

注之又南善卷溝水東流八里注之又南漢高山之水

西流三十餘里注之又南青堂溝水東流十里注之又

南雲山之水西流二十里注之又南逕三交南山之東  
左納一水導源縣東南山澗曰湍水頭西流三十餘里

注之。湫水自是而西流，左納一澗，導源永寧州西。谿谷西流二十餘里，地北注之，又西入於河。

水經注云：河水又南，陵水注之。水出陵川北，谿南逕其川，西轉入河。然則湫水南流，經臨縣東，爲左右泉澗所趨，古所謂陵川也。五朝志云：太和縣有湫水，北周烏突縣，隋開皇中改曰太和，則湫水之名蓋起於隋矣。文獻通考：臨泉縣有臨泉水，亦謂此水。元人又呼爲吃那河。元地理志：黃河正南，過保德州、葭州及興州境，又南過臨州，與吃那河合，是也。湫水導源興縣合查山麓，由大小連枝山、長城坪西南流，逕白文

鎮，折而南，受左右谿澗水，至縣南五十里，三交鎮，折而西南五十里，至磧口，入黃河。郝家坡水，在縣東北五十五里，泉源上涌，深三尺，有奇，故縣水導源。唐家溝及海子頭溝，在縣北五十里。小馬坊溝，在縣東北三十里。泉出石巖下，窰頭溝，在縣北四十里。導源紫金山北麓，太平溝，在縣西北三十里。導源紫金山東麓，喬子川水，在縣東北二十里。導源連枝山下，西逕陳莊，俗又呼陳莊河。萬安溝，在縣西北十里。導源紫金山東麓，榆林溝，在縣東北五十里。導源黃龍山，麻峪溝，在縣西北一里許。導源暴水泉、甘泉溝，在縣東

南三里許導源石巖下安業溝在縣東南十五里源中腳黃龍二山下善卷溝在縣西南十里導源趙家圪台大峪水在縣東南二十五里導源漢高山下青堂溝在縣西南二十里導源丁家溝小峪水在縣東南二十里導源雲山下鐘底溝在縣東南六十里導源湍水頭縣城西倚鳳凰山山南曰牛澗穿城而東入於湫水縣之西境皆山惟湫水起興縣自東北而西南行二百三十餘里注黃河明萬歷間知縣葛昇教民開渠築隄引資灌溉

湫水暴漲屢爲城患明宏治中知縣高峻創築護城一隄嘉靖中知縣脫鎬賀定國吳朝相繼重修萬歷八年知縣陳舜道砌石增高藉以保障者垂六十年兵燹後屢爲湫水衝壞國朝康熙四十六年知縣沈天泳開渠引流編柳作堰雍正十一年知縣徐能請公項銀三千大加修築知縣霍作明竣其事隄長百三十丈高十三層乾隆六年知府張坦讓見水勢湍急及知縣張紫極各捐俸修繕循隄之根埽疊石爲外護長百三十丈二十八年知縣丁宗懋於北頭接舊隄增長六十八丈頂衝處更築月隄二十丈三十四年復修繕完固



永寧州西北六十里南溝村谿谷之水西流二十餘里逕臨縣范家溝入湫水。

離石水一名赤洪水出永寧州北百九十里赤洪嶺是爲州之北川南流逕步佛山西又南逕方山縣故城東金貞祐四年徙方山縣於積翠山者是也又南逕一故城西唐貞觀十一年方山縣所徙治也又南逕漢高山東又南左得呂梁山之水又南逕良泉縣故城西北齊所置縣也今猶呼泉城又南大武堡北澗水西來二十餘里自右注之又南左會東川南逕州城西西山之水東南流二十里注之又西南左合寧鄉水又西逕青龍驛北至是衆泉奮湧引資灌溉又西鋤溝之水東南來注之又西逕一故城南宜爲漢之隰成縣又西逕八盤山南又西入於河。

水經注河水又南得離石水口水出離石北山南流逕離石縣故城西又南出西轉逕隰成縣故城南其水西流注於河文獻通考方山縣有赤洪水離石縣有離石水一名赤洪水。

北川自州北赤堅嶺南流二十餘里逕樹林堡又二十里逕方山堡雍正八年設巡檢司又十五里逕麻底會又十里逕津良堡又五里逕具池圪洞有故城

遺蹟又十五里逕軍莊又十五里逕橫泉堡又十  
五里逕峪口左納呂梁山水又五里逕南村堡有城  
城遺蹟又二十五里大武堡北澗水自州西北七十  
里店坪溝東流十里逕高家溝又十里至大武鎮北  
入離石水又五里逕神底堡又五里逕漫塌村又十  
里逕霜霧都堡又五里逕下安村又八里逕趙家莊  
又二里逕水西村又二里逕西崖底左會東川而南  
逕城西西山之水自州西北三十里梁家汭東南流  
十里逕棗林村又十餘里逕虎山南入離石水又西  
南十里逕交口北左合寧鄉水又二里逕賀家塌又  
十里逕上白霜又五里逕下白霜又二十里逕寨東  
又十里逕青龍鎮又一里逕柳林鎮又九里逕穆村  
又十里逕薛村又十里逕長峪村又十里逕南坡村  
又十里逕薛家坡又二里逕郭家塌又三里逕賀家  
坡又五里逕呼家原又五里至交龍口入黃河  
呂梁山之水西流逕河莊南又西至峪口入離石水  
自州西北百一十里骨脊溝西流十里逕白家汭又  
十里逕廟底又十里逕河莊又五里逕來堡又十里  
逕峪水之南入離石水

東川出永寧州東北劉王嶂之山西南流逕寶豐山北

又西南相里溝之水自北來三十里注之。又西逕伏盧山西南，左合吳城驛水。又西逕一故城，晉并州刺史劉琨所築，謂之盧城者也。又西逕州城北，而西會於離石水。

州東北七十里，小神頭始有水，西南流十里逕歸化村。又十里逕嚴村。又五里逕王村。又五里逕德綱村。又五里逕信義村。右納相里溝水。又五里逕石村。又五里逕車家灣。又五里逕下盧橋。又五里逕田家會。又八里逕七里灘。又七里逕城北，與離石水會。相里溝水導源州東北七十里高家莊，有泉西南流。

一十里逕相里村，謂之相里溝。又十里逕陽坡村。又五里逕豐義村。又五里逕回來場，而南合東川。

吳城驛水出吳城驛北山，南流逕吳城西，左納一泉，屈而西流。逕南寒灘。又西至伏盧山東南，會於東川。

自州東北百一十里馬神舍，南流二十五里逕小西溝。又五里逕吳城鎮南，石窟泉自水草灣西流注之。又西十五里逕上四皓。又五里逕下四皓。又二里逕南寒灘。又四里逕任家場。又七里逕上王營莊。又五里逕下王營莊。又二里逕郝家崖。又五里逕薄車溝。又五里逕義居村。又五里逕上盧橋。又西爲一水之



州境萬山叢雜，胥岡坡地，難以引溉。西城下溫泉，  
宏治初，知州呂大川教民種稻灌園，後因山水爲患，  
稻田遂廢。州南十五里香水巖，由大土河路口石壁  
中瀉出，甘冽兼資灌溉。州西穆村南，近離石水，村人  
陽高縣訓導王彥孔鑿渠以興水利，溉田八百餘畝。  
州北六十里有泉曰昭濟泉，古碑云：舊有海眼，波濤  
一洶涌。州西十里有潭曰電雨溝泉。州東南五十里有  
響水泉，崖半湧出，懸如瀑布。

州城西北隅，北川東川至此匯流爲一，山水暴漲，州  
一城屢被水患。明宏治初，衝州城。知州呂大川築隄防  
護，多植樹以固隄。嘉靖中，知州喬遷重修，後漸廢壞。  
萬曆二十六年，知州夏惟勤改築大隄，旋被水衝，兼  
損西城。三十六年，知州李橘重修。國朝康熙四十  
八年，州人于中丞準，雍正十二年，知州許炳元相繼  
修繕。

寧鄉水導源遠望山之左右谿澗。元和郡縣圖志：溫泉  
縣遠望山，一名可寒堆者也。今在孝義縣西南百五十  
里。水西北流，接寧鄉縣南境，又西北逕寧鄉關，左會一  
澗谷，其谷南通隰州，又西北右得泉子山二泉，俗呼清

水河又北逕東陽谷東八道岡澗谷之水合車轍山泉  
自左注之又西北逕鷹嶺西枝柯泉之水西流注之又  
北逕寧鄉縣城東又北尖陽山澗谷之水西北流二十  
餘里注之又北白草溝之水西北流四十餘里注之又  
北接永寧州南境而北會離石水文獻通考石州平夷  
縣有寧鄉水卽是水也

遠望山今名上殿山東南麓之泉俗呼馬跑泉自南

而北環孝義縣之汜上縣西南百五十五里賈家山底西南百五十五里

晉州營西南百五十五里諸村逕弓家灣之南行三十餘里西

至樂家坡西南百六十里合鳳尾村開府村並西南百六十里南來

之水接寧鄉縣南境西至寧鄉關會郭家河底南來

乾澗北流十里逕泉子山有二泉俱出南崖下俗呼

車轍泉寧鄉水南來至崖下得是泉而盛可資灌溉

又二里逕黃蒿嶺又三里逕車鳴峪八道岡澗谷微

泉細流至車轍山下其泉稍盛冬夏不竭亦呼車轍

泉流經車鳴峪亦有泉而微合於寧鄉水又五里逕

石家溝又五里逕萬年保又八里逕陳家灣又五里

逕段家莊泉源匯流至此相度地勢可引資灌溉舊

有堰曰段家堰溉地七十畝有奇乾隆三十四年三

月知縣朱懋炳勸民增設隄堰溉地三百餘畝又六

里逕馬嶺之嶺有堰曰馬灣堰

縣南三里

今溉地九十

餘畝其引而西達於城中者曰清水堰明嘉靖二十六年知縣張鏗引渠經城南建通濟橋橋記稱縣城適枕西山之隈故掘井者百仞而不及泉民甚艱焉曩嘗有軫是念者乃自西南山麓開渠引流而上直抵城中而其流未廣據此則舊渠流直達城中以供民之取汲嘉靖中乃因而廣之耳後又湮塞萬歷三十一年知縣黃應貞復引入故道城內溉地二頃有奇今城南三里橋及碑記尚存而水屢經衝刷河身甚低不能引流域內田畷悉爲民居矣城東南馬嶺北枝柯泉之水自東來會縣東一里舊有堰曰沙會堰溉地二頃有奇其北曰東觀堰明萬歷十五年修溉田八十餘畝縣北八里曰寺灣堰溉地二頃有奇今並如舊縣東尖陽山澗谷有泉西流十里逕青蒿村又十里逕尙家峪入寧鄉水縣北十三里曰大高堰萬歷十五年張堯佐引山泉循崖而西溉地四十畝今溉地六十餘畝縣北二十里曰朱家堰溉園圃地八十餘畝今如舊縣東北二十八里禪房山下有泉西北流五里逕桃園村又十二里逕椿樹坪又五里逕白草村是爲白草溝又西北四里逕朱家店而



西入寧鄉水自此而北逕歇馬店北接永寧州境  
寧鄉縣治二十五里北又北五里逕金羅鎮又五里  
距永寧州治三十里逕東西郝村又十里逕交口村與離石水會自是永  
寧寧鄉之水悉滙爲一川西入黃河寧鄉縣西北八  
十里鋤溝鎮距永寧州西六十里青龍鎮不及里許  
鋤溝鎮引青龍泉溉地一頃有奇

枝柯泉之水導源寧鄉縣東二十三里流入南大井溝  
溝東南起薛頡狐岐之坳其水循溝而北與薛頡嶺黑  
嶺之溝會而西逕蕉山南山有泉竇曰蕉泉其泉隱見  
不常又西逕穀羅溝又西逕柏窠山南又西逕鷹嶺北  
注寧鄉水

南大井溝起薛頡狐岐之坳踰山而東爲孝義縣之  
狗兒溝枝柯泉出枝柯村北流轉西三里逕穀羅溝  
又二里逕莊兒上又三里逕柳溝村柏家峪又十里  
逕倉兒灣又二里逕邢家嶺又二里逕東觀村而入  
寧鄉水

鋤溝水導源寧鄉縣西四十二里曰蒲塢泉有三竇湧  
出西流逕獅尾溝又西逕南社村又西迤北逕柏林山  
北鋤溝鎮南而西北注離石水

蒲塢泉自張蒲子村循山澗屈曲西北流二里逕樹

子嶺又二里逕劉家壩又二里逕吳家卯又三里逕楊家圪塔又三里逕上寺頭又三里逕高家莊又五里逕任家塌又三里逕廟底又二里逕石盤上又三里逕李家社又二里逕賀家社又四里逕曹家山又二里逕灰塌村又三里逕南社村又五里逕張家灣又二里逕鋤溝鎮又西北入於離石水

石口泉之水導源寧鄉縣西南五十五里西流逕棗坪又西逕北新安又西北永寧石樓與寧鄉之地相交錯寧鄉縣西南八十里有泉曰聚星泉其實衆多故名西流逕留誼村又西逕惠家坪又西池北會石口泉之水又西北逕下堡入於河

石口泉出縣西南石口子頭西流二里逕莊兒上又一里逕草舍村又三里逕棗坪又一里逕婁家塌又二里逕于坪又六里逕留次村又五里逕武家莊又一里逕高家莊又七里逕劉家圪梁又二里逕喬家莊又五里逕蘇家莊又四里逕康家坪又二里逕嘉善村又五里逕金家莊又八里逕北新安又西爲永寧石樓之地交錯其間踰之而西復至寧鄉縣境下堡入於黃河

聚星泉在郝家圪塔循山澗西流三里逕南石盤又

一里逕劉家莊又五里逕杜家莊又二里逕衛家漢口又三里逕留誼村又八里逕周家漢口又五里逕田家圪塔又五里逕高家畔又三里逕高家圪塔又十里逕惠家坪而西北會石口泉水

暖泉鎮之水泉源所導曰牛尾泉在寧鄉縣西南百里自鎮西流逕沙塘接石樓縣南境又西北復至寧鄉縣境烏林泉出縣西南百二十里西流注之又西北逕石門山南而西注於河

牛尾泉出暖泉鎮西流五里逕韓家莊又三里逕補村又二里逕雷家莊又三里逕柳樹溝又二里逕鮮花莊又五里逕王家莊又五里逕岳家山又五里逕沙塘村又二里逕石樓縣之漢兒上又三里逕楊家坡又五里逕平底又十里逕野雞坪又五里逕橋子頭又五里逕培溝又十里復逕寧鄉縣之長興村又千里逕莊頭又五里逕下塌上入於黃河自暖泉鎮至沙塘村引牛尾泉溉地舊曾設渠規渠長溝頭司之恒遇微涸細流不敷灌溉於是渠規遂廢暖泉鎮與清水河隔越重山而山西通志云寧鄉縣西南引清水河繇暖泉鎮起誤也



烏林泉山下。流三里逕前漢上。又五里逕  
家圪臺。又五里逕新莊。又十里逕石樓縣之土門等  
村。而西入暖泉鎮水。

府舊志載寧鄉縣野狐泉。清冽可解暑毒。寧鄉縣舊  
志作水神泉。在縣治西北狐尾溝。又二郎坪泉。在縣  
治西北二里許。有兩泉相距不數武。南甘北鹹。迥別。  
龍泉水。出石樓縣東南四里。俗呼屈產泉。自石罅瀆瀉  
西流。會於谿澗。其谿導源縣東南四十里。水經注之。牧  
馬川也。西北流合龍泉。謂之龍泉水。又西北有一澗。西  
流二十七里。注之水經注之。土軍水也。又西北逕城東。  
又西北左得煖泉坡之水。又北有一小澗。導源縣東五  
十里。西流逕石羊山南。自右注之。又北屈西行九十餘  
里。入於河。

水經。河水南過土軍縣西。酈道元注云。縣有龍泉。出  
城東南道左山下。牧馬川上。多產名駒。其水西北流  
至其城東南。土軍水出道左。高山西南注之。龍泉水  
又北。屈逕其城東。西北入於河。案今土俗不復知有  
龍泉水。牧馬川。土軍水之名。惟泉之在縣東南者。今  
猶古耳。因水經注言牧馬川。土產名駒。後人遂傳合  
春秋屈產之乘。及夷吾奔屈。故有屈產泉之目。又於

泉崖上建晉公李爽古廟考北屈在今吉州不在此  
城東南山俗呼神嶺山屈產泉出其麓流入谿澗澗  
水出縣東南四十里東溝村俗呼沙河西北流會屈  
產泉又北一里許會東沙河其水出縣東三十里成  
家溝匯流之處西北距城一里由城東繞城而北與  
城西之沙河會又六里石羊山下小澗導源縣東五  
十里劉家圪臺村西至縣北十里東衛村入於沙河  
其澗恒爲乾澗

溫泉川之水出石樓縣西南四十里煖泉坡下北流十  
里迤東右會一谿澗其谿導源縣東南三十里東北流  
左合煖泉坡水又東北有澗南來三十里自右注之又  
東北逕城西而東北入於龍泉水

煖泉坡在縣西南井滿村流合縣西南三十里解莊  
汛沙河匯流處距城十五里地名龍臺村又五里至  
段莊縣西南三十里車家坡之水逕譚莊北流匯入  
又東北至城北四里與城東之沙河會

今石樓縣卽以東西谿澗夾流爲城濠山水暴漲屢  
衝城址雍正八年知縣袁學謨於城東北開濬支河  
隨遇水衝涌起沙土水改北流不繞城下其流處長  
百九十丈上流廣四丈深七尺下流廣六丈深五尺

山西通志卷之四 地理志 汾水 汾水出寧武府寧武縣西六十里樓子山即管涔山之別嶂也南流由忻州之靜樂縣西太原府交城縣北陽曲縣西太原縣東徐溝縣西復經交城縣東南而由文水縣東至府屬平遙縣西北境西南流逕故蔚州城西又西南逕縣西故來城東又西南接介休縣東北境又西南逕故鄆城北左得侯甲水縣東南鶯鶯泉之水亦北流注之又西南逕介休縣北孝義縣東南文水自右注之又西南白溝水東流二十餘里注之又西南一水導源靈石縣北山逕孝義縣南屈而東流十餘里注之又西南柳壁水東流十餘里注之又西南逕介休縣西又西南入雀鼠谷接平陽府境由靈石縣北霍州西汾西縣東趙城洪洞臨汾之西襄陵太平之東曲沃縣西北絳州稷山河津之南西入於河歷府境平遙孝義介休三縣其故道自文水縣折而西逕汾陽縣東後一再東徙不復至汾陽縣境矣

以上臨永寧寧鄉石樓四州縣歸黃河之水

汾水出寧武府寧武縣西六十里樓子山即管涔山之別嶂也南流由忻州之靜樂縣西太原府交城縣北陽曲縣西太原縣東徐溝縣西復經交城縣東南而由文水縣東至府屬平遙縣西北境西南流逕故蔚州城西又西南逕縣西故來城東又西南接介休縣東北境又西南逕故鄆城北左得侯甲水縣東南鶯鶯泉之水亦北流注之又西南逕介休縣北孝義縣東南文水自右注之又西南白溝水東流二十餘里注之又西南一水導源靈石縣北山逕孝義縣南屈而東流十餘里注之又西南柳壁水東流十餘里注之又西南逕介休縣西又西南入雀鼠谷接平陽府境由靈石縣北霍州西汾西縣東趙城洪洞臨汾之西襄陵太平之東曲沃縣西北絳州稷山河津之南西入於河歷府境平遙孝義介休三縣其故道自文水縣折而西逕汾陽縣東後一再東徙不復至汾陽縣境矣

據水經文水到平陶縣東北又東入於汾原公水過茲氏縣北又東入於汾平陶故城在今文水縣西南



二十五里似今陽汾陽孝義東境文水所經即水經

汾水故道水經注文水與勝水合又東南入於汾其

注原公水云水入文湖不至汾也似與今改流之汾

水不殊考汾水舊由文水縣東北五十里北安都屈

西至縣南二十五里河南都入汾陽境明萬歷三十

九年東徙由縣東南四十里齊南都入平遙境水之

東岸經郝莊趙坦村安固村樂村羌城縣西四里西岸

由文水縣永樂村入汾陽境經尹家社狄家社閻家

社裴家會並縣東北四十五里郭家莊東社村李家莊並縣東北四十

里九枝社縣東北三十五里演武鎮縣東三十里辛愛村縣東三十

里師家莊縣東南二十里董家莊縣東南二十五里其平遙縣羌城

之下接入汾陽縣經韓家橋西河堡並縣東南三十五里大王

村縣東南四十五里北小堡縣東南四十五里孝義縣汾水則由汾陽

縣入境西岸經新莊縣東北十三里盧家莊縣東十里五路莊縣

南十里鄭家營縣東南十二里南姚村縣東南十五里董屯縣南二里東

岸經南小堡縣東北十六里大堡張家莊並縣東十五里橋頭村縣

十七里霍家堡縣東二十里介休縣汾水由孝義縣入境右

岸經橋頭村縣北二十餘里左岸經羅王莊大宋曲小宋曲

並縣西少國朝乾隆三十二年又徙而東不入汾

陽縣境東岸經任莊縣西北二十五里杜家莊縣西北二十里東范

陽縣境東岸經任莊縣西北二十五里杜家莊縣西北二十里東范

落村縣西北十五里西張趙村縣西北二十里西岸經平遙縣

之辛村西范落村並縣西北三十里青落村並縣西北四十里薛家莊並縣西北四十里

寧固阜縣西三十五里蘇封村岳封村並縣西四十里王智村官

地村靜化村並縣西南四十里接介休縣經北鹽場縣東北四十里

北辛武村縣東北三十里東西大期村並縣東北三十五里席村那村

並縣東北二十里洪相村縣東北二十五里至橋頭村歸故道孝義

縣則自萬戶堡入境縣東少北三十里西南至北橋頭村縣東

十七里合文水以下復行故道又十里許合白溝水又

數里合王馬水又五里至董屯縣南少東二十五里合嶺壁溝

水溝南即介休之嶺北村縣西北二十五里此汾水東西轉

徙之大致也

汾水舊經汾陽縣東地高河卑瀕河或用桔槔汲水

溉畦明嘉靖中分守冀南道趙祖元疏渠造江浙水

車教民引溉民甚利之後淤徙不常遂廢萬歷二十

七年介休縣知縣史記事於縣西北羅王莊開渠引

汾水南至孫暢村長千五百二十七丈廣丈五尺深

丈溉田三十六頃有奇又與平遙縣知縣魏學徵共

興水利自平遙縣東至介休縣北開渠引汾水在平

遙境長二千六百三十丈在介休境長二千二百八

十丈渠廣六丈溉平遙縣地百頃介休縣地百十六

汾水舊經汾陽縣東地高河卑瀕河或用桔槔汲水

頃其水程自下而上以次灌輸先介休引灌十五日  
後平遙引灌十四日其平遙介休汾陽孝義舊渠萬  
歷二十九年孝義縣知縣周佑請分四縣水利起十  
月之朔止次年二月平遙縣於十月一日至十一月  
七日介休縣於十一月八日至十二月十五日汾陽  
縣於十二月十六日至正月二十一日孝義縣於正  
月二十二日至二月終而孝義又分四堰永安渠引  
經新莊許鹽鍋頭村南船頭村小堡村福谿渠引經  
大堡村程家莊李家莊濟民渠引經橋頭村張家莊  
盧橋渠引經盧家莊別有仁德渠後並衝壞更濬利  
一導渠自汾小轉徙後渠堰悉廢

侯甲水出沁州武鄉縣西北百里侯甲山北流屈西逕  
太原府祁縣北俗呼沙河西接府屬平遙縣東北境西  
南流左得嬰澗水又西南逕故京陵城北又西南逕縣  
西北故中都城北左得過嶺之水又西南左得亭岡水  
又西至介休縣東北逕故鄆城南而西北入鄆陂以達  
於汾

水經注侯甲水逕祁縣故城南又西逕京陵縣故城  
北又西北逕中都縣故城南城臨際水澗又西合嬰  
侯之水逕鄆縣故城南又西北入鄆陂而歸於汾流



矣。元和郡縣圖志：祁縣胡甲水，一名太谷水，東南自潞州武鄉縣界流入，又南入汾州平遙縣界。案此水逕平遙縣，自縣東北三十里山胡村入境，行三十五里合中都河，又三十五里至靜化村，接介休境。水側有長壽村，故俗呼長壽河。夏秋暴漲，屢漂民舍。水經注言逕中都縣故城南，今逕中都城北。蓋水道徙流也。

嬰澗水出平遙縣東南鹿臺山，俗呼鹿臺河。水經注所謂嬰侯之水也。又西北魯澗水出縣東南過山，北流逕青城西而北注之。又西北會於侯甲水。

一、文獻通考：平遙縣有鹿臺山，嬰澗水。劉嶠遊鹿臺山記云：山之陰，嬰溪出焉。東北流入深壑，及出山，由東崖岡底陰溝村，石壁夾立，灌嬰廟在谿東二里，嬰澗之名，或以灌將軍故墩。雷潔疏中都河記云：城東一河名魯澗，自東引入城，流縣衙側，有華林園。城中央有賀蘭橋，厥後魯澗衝湮溝塹，不復入城。滌澗案鹿臺山，嬰澗水經注引山海經：嬰侯之水實之，則其名非起於灌嬰矣。平遙縣東，今爲中都水所經，而魯澗又在其東。又東則嬰澗，又東則磐石山水。此三澗皆引資灌溉，其水不復匯流成川。山水盛漲，乃通流入

沙河魯澗導澗承坑澗之西引澆東郭村洪堡關  
良莊龐莊地澗之東引澆細腰村金莊地各設渠惟  
龐莊乃散漫餘水微潤地吻無渠道嬰澗之西引澆  
府底村地澗之東引澆羅鳴後村地以北岐爲二渠  
西渠之西引澆閻村五里莊地西渠之東引澆新盛  
村大閻村小閻村地東渠之西引澆西襄垣村欽賢  
村郝同村郝家堡洪善村地東渠之東引澆東襄垣  
村梁官村地皆設支渠磐石山澗至原野岐爲二渠  
西渠之西引澆白城村地東渠之西引澆柏生村地  
東渠之東引澆郝開村地皆設支渠

過嶺水有二源東源出平遙縣東南過嶺之陰西北流  
有泉出縣東南十五里曰原祠水平地涌泉北流注之  
又西北左合西川西源出縣南超山北流合東川一名  
祀水俗呼中都河北逕縣城東迤西會於侯甲水

水經注云山海經稱謁戾之山嬰侯之水出於其陰  
北流注於汜水水右出汜山其水殊源共合注於嬰  
侯之水亂流逕中都縣南俗又謂之中都水侯甲水  
注之案嬰澗以西諸山源合成一川而會於祁縣來  
之沙河後因各上游渠堰支分水散原野不復通流  
超山水俗又呼原公水又呼賀魯水因汾陽縣之原

公水傳命於...城南引而西合石城山之水入  
鄔陂其後洪善驛分水飲馬開隄北引明嘉靖十四  
年因水衝城東北角知縣曹倬委典史吳欽於城東  
南一里開渠深七尺廣二丈長二里築隄長百二十  
步崇三丈五尺廣十五步名中都堰水仍逕城南西  
流萬歷二十三年定七分往西三分往北資溉民田  
用石砌築渠口以防衝決二十九年山水漲渠口衝  
塌水直北流三十六年以地形西高北下引北勢易  
仍定三七分水衝塌處厚加築塞使全力西注於隄  
開一小口細流往北於是均受水利而無水害崇正

一 間山水暴漲壞隄西渠淤塞水遂北流 國朝乾隆  
二十七年知縣李在田詳請乃於南門外築隄護城  
長五百六十丈以防南山諸谿澗水暴漲

過嶺水東源俗呼邢村河惟澗之東引溉新村郭休  
村青村邢村西郭村地西源俗呼超山河澗之西引  
溉西坡村西源寺村地澗之東引溉水磨村圪塔村  
東泉村趙壁村地其與邢村河合流以下由縣城東  
屈逕城北引溉侯郭村道備村遊駕村南政村劉家  
莊地皆設渠

亭岡水出平遙縣南山北流逕亭岡城東又北屈西有



澗導源縣西南山谷自左注之又西入侯甲水

亭岡水俗呼路牛河導源路牛石城諸山縣之南山也其西曰官溝路牛澗之西引溉石渠村薄泥村黎基村岳壁村地澗之東引溉偏城村西泉村地官溝導源縣西南山俗呼門士神山溝西引溉常村侯冀村杜村地溝東引溉安社村七同村梁趙村地皆設渠此二水散漫田間不復匯流成川山水盛漲則西至縣西南四十里靜化村入侯甲水

鄆陂俗呼鄆城泊在介休縣東三十二里水地記圖注曰漢書地理志太原郡鄆縣九澤在北是爲昭餘祁并州藪水經注云其陂東西四里南北一十餘里陂南接鄆呂氏春秋謂之大陸又名嘔夷之澤俗謂之鄆城泊侯甲水逕祁縣故城南自縣連延西接鄆澤是爲祁藪也卽爾雅所謂昭餘祁矣逕鄆縣故城南謂之鄆水俗亦曰慮水慮鄆聲相近故因變焉魏書地形志鄆縣慮水入嘔夷澤案之周官經職方氏并州其山鎮曰恒山其澤藪曰昭餘祁其川虜池嘔夷其浸涑易爾雅釋地則曰晉有大陸燕有昭餘祁呂氏春秋九藪稱晉之大陸趙之鉅鹿燕之大昭胡朏明禹貢錐指謂呂覽旣云晉之大陸又云趙之鉅鹿如大陸卽鉅鹿則一澤不應

兩見故道元以郭澤當之今考胡氏之言亦未盡覈呂覽趙之鉅鹿宜爲廣阿澤今日大陸澤在順德府信縣東北左氏春秋魏獻子田於大陸杜元凱以爲汲郡脩武縣吳澤今在懷慶府脩武縣北馬融言晉地自朝歌以北至中山爲東陽朝歌以南至軹爲南陽今南陽城是也城在今脩武縣北水經注云脩武故甯也亦曰南陽魏獻子田大陸還卒於甯大陸卽吳澤矣據元凱善長以吳澤釋春秋傳之大陸此澤自三晉分後地屬於魏秦漢間人凡舉魏多以晉目之而韓趙則各目其國以魏得晉之舊壤晉舊都在魏故也爾雅及呂氏春秋晉之大陸皆宜以脩武吳澤實之郭璞言誘之注並云廣阿澤非也道元以晉大陸爲鄆陂使別於趙鉅鹿而鄆陂亦趙地旣趙與晉對言則晉專以目魏而非未分之晉矣至以鄆陂爲昭餘祁始於班孟堅徒因東北近祁縣致滋傳合周職方昭餘祁與虜池嘔夷涑易並舉宜爲今之東西澱水經注所謂雍奴藪自鮑邱水之南南極虜池西至泉州雍奴東極於海其澤野有九十九澱宋時東塘灤西塘灤亦在是間自餘無復大澤可以當并州藪者且其上游卽承涑易之水寔七國時燕地故爾雅稱燕有昭余祁呂覽稱燕之大昭右鄆陂去燕



絕遠不可繫之。燕甚明。周職方。嘔夷之水。乃澠水。班孟堅許叔重並言之。今俗呼唐河。鄭康成注周禮。疑嘔夷卽祁夷。偶未省照也。嘔夷出靈邱。祁夷出平舒。並今大同府境。然源流各別。酈道元魏收又目郿陂曰嘔夷澤。尤失之。嘔夷亦川而非澤。郿陂據漢志有九澤之目。蓋自平遙介休間。東北至祁縣西。地勢之下者。往往成陂澤。以故汾水至是東西轉徙。而昔時澤名亦因汾水徙流。或改爲川。或淤爲平地。非復舊蹟也。

鷺鷥泉出介休縣東南洪山。水經注謂之石桐水。山卽絳山之別嶂也。民間引渠資溉。無通流正川。其餘水北入於汾。

水經注云。汾水又南與石桐水合。卽絳水也。水出介休縣之絳山。北流逕石桐寺西。卽介子推祠也。又西流注於汾水。汾水又西南逕介休縣故城西。城東有徵士郭林宗。宋子浚二碑。案是水俗以爲勝水。因目所出之山爲狐岐山。又以洪山村故城當六壁城。皆因孝義。縣西之狐岐山勝水六壁城。傳合於此。非也。舊稱宋文潞公始於鷺鷥泉下開三渠引溉。其渠俗皆呼爲河。一池東曰東河。一北至石桐村始分。縣東南二日中河。曰西河。其導源於鷺鷥泉。東源神廟前者。



曰洪村河亦分爲兩泉之水入焉流至狐村曰狐村  
河舊額東河水地五十三頃六十七畷七分有奇中  
河水地三十八頃八十五畷一分有奇西河水地六  
十頃七十六畷二分有奇洪山河水地十六頃七十  
六畷七分有奇狐村河水地二十頃一畷七分有奇  
水程始三月三日終八月一日每日灌地二十七畷  
明嘉靖二十年分守冀南道於敖見西河壅淤命知  
縣董宗魯興其役循故道濬深七尺併構隧道二百  
餘步高二尺廣二尺有奇謂之石河引達泮池二十  
五年知縣吳紹曾申明前法修築隄防隆慶元年知  
縣劉旁因賣水買水之弊設舊管新收冊以杜爭訟  
萬歷十五年知縣王一魁因有地無水有水無地之  
弊立法以水隨地以糧隨水二十六年知縣史記事  
因中西兩河至石桐村始異派每起爭端舊有石夾  
口水牌版歲久朽壞乃立石欄鑄鐵爲空以中河地  
近四十頃定空四尺西河地近六十頃定空六尺令  
四六分水二十七年以鸞鸞泉日可溉六十畷有奇  
而舊冊所載日溉二十七畷或水泉盛於昔時然弊  
端卽因之起更計地定程以次灌輸前此三月以後  
八月以前水程有定額至冬春間皆洩於汾是年冬

乃設冬春水額俟秋不得水者亦列於冊得分資  
餘水東河二十村分溉共地百三十一頃中河九村  
分溉共地七十三頃西河十八村分溉共地六十九  
頃八十畝狐村河兼溉許大村共地八頃九十五畝  
承中河之下爲馬家河十四村分溉共地百七十二  
頃崇正間有欲壞此額者知縣李雲鴻以冬春不侵  
額內而廣利額外此惠而不費前令爲民不易之法  
也使一準舊規行之後東中西三河農民與洪山河  
農民爭水知縣李若星於鸞鷲泉分水入洪山河處  
鑄鐵爲空廣三尺高五尺以滿鉄空爲度餘水仍退  
入東中西三河而狐村河與洪山河分水處又有鉄  
空及石空四六分水狐村河四分洪山河六分國  
朝康熙八年知縣李鍾盛於三渠舊所設水平易木  
以鉄使永久無弊二十二年知縣李應龍於洪山分  
水處易石平以鉄平二十八年西渠中渠構爭知縣  
王植設花名地畷水程冊石桐應用西渠水六分中  
渠水四分其有餘不足則有變通之法準四六折算  
以水還水又謂八月尙須灌溉改至九月寒露後方  
停止乾隆三十年洪山河設一水磨至五十二年新  
渠決口沙泥衝入東河水不得行知縣王謀文察知

由一磨之微妨於灌溉即使折毀鸞鶩泉之利資溉  
方數十里東河自洪山村分行伏入地中貫洪山河  
下出於磨溝村南度樊王石河溉連福下莊李屯張  
良胡龍武屯蘇場楊屯北張王里霍董鹽場南辛武  
沙堡等村中西兩河自石桐村分行中河溉石桐下  
磨頭三嘉湛泉洪善段屯永安等村西河溉褚屯崇  
賢曹麻宋丁溫等村及城東廂而石桐三嘉亦分溉  
其引灌之次設有程額水薄舊法兩月溉地一次周  
則復始後因爲日遲久酌定一月一周遇單月引溉  
名正水雙月引溉名破水引溉之法先遠後近又以  
三河自首至尾長至四十餘里末流渠經久涸水下  
易耗於是正程之外先行浸潤名曰浸水立法至密  
然如東河南北鹽場等村近因汾川徙流沙淤地高  
水無所用昔之以水隨地以糧隨水者今則糧無所  
出將應得水程轉賣雖程額水簿所載照地均算而  
高下變遷難以槩論在有司審察利病隨時治之以  
平其爭而已

鸞鶩泉之外縣東三十五里柳溝村曰悶津泉一名  
連山水溉地一頃九十五畝二分有奇又一泉曰武  
同泉武同村溉地十五畝縣東三十里曰龍洞溝泉



胡龍村溉地四十二畝二分有奇縣東二十里曰蒲池泉在湛泉鎮之西溉地十九畝七分有奇縣東南二十里石桐村曰灰柳泉有二泉相距數十步溉地一二十三頃九十三畝有奇縣南五里曰龍泉亦呼灰南泉及東柳等泉舊溉城南上下堡常樂村地五頃八十九畝有奇康熙四十四年泉忽竭至雍正十一年涌出如初并增新泉六空附近井泉舊須汲引今亦溢出資溉遂倍於昔共溉地十七頃六十九畝有奇縣南七里曰南河泉遐壁村溉地二畝縣南十五里曰宋壁泉東宋壁村溉地十二畝有奇又一泉曰龍白溝泉西宋壁村溉地十四畝九分有奇縣南少西十里曰謝峪泉謝峪村溉地七頃六十一畝一分有奇縣南二十五里曰龍雨泉萬光村溉地二十五畝四分縣南四十里縣山下曰利民泉興地村溉地十二頃七十畝九釐此泉與靈石縣分灌靈石十二日介休十七日明崇正十五年縣山水暴發漂壞民田王廷傳於渠南谷口壘石堰長百二十丈廣丈崇八尺俾山水悉歸渠內諸泉冬春水額閘津泉八村分溉共地二十六頃灰柳泉十村分溉共地八十三頃謝峪泉八村分溉共地三十一頃介休縣舊志載

磨溝泉六村分派共地一項五十一畝水程十日畢放水與謝谷泉同澗下八村地葫蘆三道河六村分溉共地二十頃此二渠及中渠之下馬家渠皆有冬春水額而無夏秋水

縣境泉流之無關水利者東北二十八里曰小橋泊西入於汾縣東北五里葫蘆河出馬汝村北縣東南四十里東洪谷有泉發岩頂曰懸泉谷中又有黑龍池有白牛泚縣東北二十里段屯村有泉曰拔截泉鄙語云尉遲敬德敗單雄信拔截於此縣南五十里縣山有泉曰蜂房泉又有泉名下馬泉縣山之箭桿

嶺下有澗曰砬石澗流入汾久涸縣東五里宋牯村

後平地涌泉流分三派俗呼三道河逕下站村縣北八里

於汾縣西北七里大宋曲明萬歷三十四年井泉倏涌溢流可溉地數畝俗呼井成泉縣西十里有渠俗呼內封河

以上平遙介休二縣歸汾川之水

文水導源太原府交城縣西山出谷逕文水縣俗呼文峪河南流接府屬汾陽縣之東北境又南得隱泉水原公水金鎖關水南逕縣東得清溝水又南得薛頡嶺之水又南接孝義縣東北境又西南勝水自右注之池東



入於汾

文谷在文水縣北二十里其水自西北來水經文水出大陵縣西山文谷東到其縣屈南到平陶縣東北東入於汾酈道元注文水逕大陵縣故城西而南流有泌水注之又南逕平陶縣之故城東西逕其城內南流出郭又南右會隱泉水又南逕茲氏縣故城東為文湖又東逕中陽縣故城東又東南流與勝水合又東南入於汾大陵故城在今交城縣西南十里前隸文水縣後割土安都易之因隸交城平陶故城在文水縣西南二十五里文水縣志云文峪水出永寧

州孝文山一出交城縣西山半崖龍口一出本縣土

安都泊泊河縣西五十里三水合流從文峪口開柵鎮向

東南流今是水自文水縣南流與汾陽縣東北五十

里接境以下逕百金堡縣東北四十里南堡村縣東北三十里康

家堡縣東二十里之東迤西轉南逕雷家堡瀦城村申

家堡之東並縣東十里迤東逕北莊村縣東南十五里乾河村之

東縣東南十八里轉南逕師家莊之西縣東南二十里董家莊之東

縣東南二十五里西河堡之西縣東南三十五里迤西接孝義縣南

船頭村之西縣東北十八里新莊之東縣東北十三里轉南迤東注

汾水昔時於汾陽縣即與汾會自乾隆三十一年汾



徙而東文水徙而西孝義縣始有文水然考之水經注文水既合勝水乃入汾與今之水道無異而前後地志所記或過文水縣卽合流蓋汾水既東西轉徙於汾陽孝義東接平遙數十里間文水至此隨其所棄之故道通塞而或因或決亦遂無定此小水附近大水者必然之勢於水之左右相其地形酌用縷隄遙隄之法亦補救之急務也

隱泉水出汾陽縣北謁泉山之上循磴透池東注山下又東逕文水縣西南以下無津渠通流山水盛漲乃趨下地入於文水

水經注文水又南會隱泉水水出謁泉山之上頂頂上平地一十許頃沙門釋僧光表建二利泉發於兩寺之間東流礮石沿注山下又東津渠隱沒而不恒流故有隱泉之名矣雨澤豐澍則通入文水今文水縣境呼爲清泉渠南廟碑云文水縣池南五里鄉名樂村乃隱泉之所經泉流自是而澄清可濯故曰清泉

原公水出汾陽縣西北白彪山麓俗呼壺盧谷故是水又名壺谿語轉字訛遂呼賀魯水泉源所導至今猶留原公池之目俗亦呼馬跑泉鄙語云北魏賀魯將軍駐

師於山馬路得泉或曰禿髮傳檀之子魏世祖賜姓源後又賜名賀者皆非也唐貞觀永徽間西突厥有賀魯其人屢爲邊患顯慶初始平之然足跡未至河東而茲水之稱原公水以七國時趙襄子之臣原過得名則遠在秦漢前矣一名石鼻溪東南流逕羊頭山北又東逕縣北又東入文水

水經原公水出茲氏縣西羊頭山東過其縣北又東入於汾酈道元注云水注文湖不至汾也案汾水至交城文水二縣下東西轉徙隨時不同故文水入汾或遠或近水經作於三國魏時下至北魏文水右納

勝水乃會於汾前此入汾之水改而入於文水耳原公水俗又呼峪道河明嘉靖戊午萬歷乙酉癸巳並經濟治春初秋末農事不舉自金莊村

縣西北三十里

分三

之一引入城中過此時則農民資溉田畝國朝康

熙二十六年循入城故渠通之今復淤塞趙日昌馬跑泉水碑記云峪道河經王化里和美里太和里董正里羅城里其村落則金莊尉家水泉田家溝李家溝劉村莊下太平董寺古浮圖羅城金井五里十二村匯諸泉爲一渠輪流澆灌復開渠引三分之一遶城濠入浮池碑在縣儀門左考峪道河經古浮圖而

下由賈家堡西馬寨村雷家堡宣柴堡義安  
村康家堡安頭村北莊村乾河村師家莊入汾此數  
年前故道也乾隆三十二年汾徙而東文水徙而西  
於是雷家堡以下舊爲原公水所經今爲文水所經  
而師家莊以下及孝義縣東舊爲汾川所經今爲文  
水所經驗之近事數年前故道彷彿與水經合今時  
水道彷彿與水經注合然則民之田廬衝決漂沒今  
古同慨司是民者所宜加之意也

峪道河之水有泉曰悶泉舊志云在城北八里賈家  
里平地渟淵湛澹池闔闔如壁其脈散漫流行無湍  
激聲故名山西通志云民穿引藝稻旱歲不竭

金鎖關水出汾陽縣西三十里關峽一名懸泉水俗呼  
向陽峽水東流有澗由縣西張堡東流池北注之又東  
逕縣北又東入文水舊與原公水同潄於文湖今不復  
潄蓄矣

此水過向陽村引資灌溉以下恒爲乾澗山水盛漲  
乃通流其右一澗俗呼禹門河導源山谿至張家堡  
有泉曰麻窟泉汾陽縣志云禹門河又名禹導河麻  
窟水在張家堡村民引溉田又云禹導河從馬跑泉  
出會上林舍縣西三十里安家莊張家堡並縣西二十里諸泉東



流四十里入汾禹門河從張家堡泉出至河口伏沙  
潛注東流轉北入馬跑泉水禹門禹導之名或合爲  
一或分爲二其名皆起於鄙俗無足置辯

文湖在縣東十里水經注云文水南逕茲氏縣故城東  
爲文湖東西一十五里南北三十里世謂之西湖在縣  
直東一十里湖之西側臨湖又有一城謂之瀦城水澤  
所聚謂之都亦曰瀦蓋卽水以名城也自北魏之西河  
郡治茲氏城唐上元以後又以西河名縣故陂地唐謂  
之西河泊宋則謂之西河灤元和郡縣圖志汾州西河  
縣文湖一名西河泊在縣東十里多捕魚之利宋史河  
渠志熙寧元年正月復汾州西河灤灤舊在城東圍四  
十里歲旱以溉民田雨以瀦水又有蒲魚菱芡之利可  
以給貧民前轉運使王沿廢爲田人不以爲便至是知  
雜御史劉述請復之明謂之瀦城灤

文湖因文水得名蓋起於晉及北魏之世前後文水  
徃徃不及至是已入汾川而文湖所匯汾陽西山之  
水自洩於汾故宋謂之西河灤以西河縣名之也明  
謂之瀦城灤以陂側之城名之也若水經注言世謂  
之西湖則又以陂在文水西得稱後人引水經注改  
湖爲河以證此地古名西河因乎是謬矣明萬歷四

年分守冀南道張士佩令治渠堰俾得宣洩孔天胤碑記云濠濱公以布政左叅政分守冀南開府於汾下車省方問民疾苦則得水之所以爲利害義安里有渚水一區曰瀦城濠其濠西北受張堡河十八澗之流東南隔汾河二十五里匯不得輸天雨暴漲則彌原淹野敗壞民田凡七里十一村旱則無補於漑公乃察河壩之紆直相水維之弦緩畫方畧定準裁下令鑿渠增堰自濠頭起逕通河口渠長九千二百五十步闊四丈深五尺堰高七尺兩堰基各闊一丈收頂各六尺渠高連堰共深一丈二尺渠有長長有夫其力用里疇之民其易買渠地與犒勞工役用公府之粟由是數百年淤滯之陂一朝通理委輸而會之川渠以衍澇堰以禦衝計民得安好腴田二萬二千四百疇有奇久之渠水充積猶足以資灌注而退灘之餘又倍利秔麥汾陽縣志云瀦城村一帶舊係文湖深一丈長十五里闊八里文峪河及隱泉諸水皆入而匯爲水澤千頃稻粱莫不待灌而窮民網罟亦資鮮食文湖神廟記迄今可考嘗見東南水利甲於天下者以割田爲湖旱則蓄之潦則洩之雖有凶災而民不困西北之水則又貴蓄而不貴洩文湖當

時納而不吐故得常盈不涸金大定間濱湖居民浚渠入汾太守傅公慎徽力爲嚴禁守去終引而注之勅以爲田無論傍湖膏腴多旱曠之虞皆變石田卽此地亦惟旱年可熟略有霖霖輒致淹沒但知窪地可田而不知餘田失水也但知低田可耕而不知凶年賠累也今欲全濟爲澤勢必不能當法割田爲湖之意規其半以蓄水導上流會納而勿使通於汾其所鑿地賦均攤於傍湖之田晦庶幾稍免賠糧之害而實獲積水之利矣但愚民當被災之時或亦願行而當收穫之年遂忘貽害

清溝水導源汾陽縣西南谿澗東北流右合一泉曰石

莊泉

縣西南十里

又東逕縣南入文水

舊志清溝水在城西南十里出尉陵谿谷流注會石家莊水泉經流城南入喬東等村民引以溉田又名董師河

薛頡嶺之水有南北二澗北澗名善利渠循谿谷東流迤南轉而東北岐爲二左渠東逕陽城之北魏書地形志汾州隰城縣有陽城者也其水東注引資灌溉右渠南流逕陽城西屈而東逕其南又東亦引以資溉分醜之餘東入文水



方輿紀要云善利渠在府西南西山諸泉源會流爲渠東西首尾凡百餘里有溉灌之利劉希參碑記云善利渠自薛頡山尾入汾其源初發口出谷泉後改今名首尾百里有奇從靳家莊迤邐漸東四五十里間始散漫行故陽城見喜乾河等村隨在開築甚賴其利

此明洪武八年修渠碑

王廷槐善利渠圖記云府城西南

九十里曰薛頡山善利渠出焉東流十里經王家池迤而東南流二十五里經楊家莊又東五里經靳家莊又三里經韓家原轉東北流五里經源頭村又五里經莊子村南平陸村北又東八里經河北村又三里經牧莊又三里經文侯村又三里至西陽城西北渠分爲二夾陽城而東其經陽城之北者爲北渠行五里許至東陽城始可引灌

以上渠深地高至此始落平

其導而

南轉東者爲南渠行十里許至見喜村始可引灌舊

設水額北渠溉東陽城吳南里二村地凡歷二年有半南渠溉見喜村地歷一年有半如寅年三月之一

日閉南渠開北渠至辰年七月一日則閉北渠開南渠年年三月一日復閉南渠開北渠以是循環遞及

三村所溉地百頃有奇餘水匯於文湖以達汾

此所紀里

數以兩村相距言其水道迂迴不止此故舊碑云百里有奇

薛頡嶺南澗土人呼金沙水左右汾陽孝義之間左則靈浮泉東南流注之右則賈壁水出龍隱山東南麓東北流注之又東版峪水出龍隱山之陽東北流注之又東三泉谷之水東南流注之又東歷三堰二縣附近隴塤引渠資溉又東入文水

薛頡嶺之西爲寧鄉縣界循山溝而西與南大井溝會於蕉山東南嶺東爲澮溝卽金沙水所導源也舊志靈浮泉在城西南四十里趙景王村俗傳景王禱水而泉應故名三泉水在城南二十里出三泉鎮山谷中西接靈浮東南流分爲三堰二屬汾陽一屬孝

義引水灌地各有日期載水利碑其水清冽異常故瀕泉陰處經冬每結層冰至夏不釋城市當盛夏鬻冰者皆往取之考金沙水起薛頡嶺東其澗谷曰澮溝下流俗呼爲義河孝義縣新志義河一名金沙河又名行春川源出薛頡嶺東南迂迴一百四十餘里入文峪河自發源東行三十餘里北爲汾陽南爲孝義又東至龍隱山轉東南行三十里許有賈壁水自西來注又東二十餘里有版峪水自西南來注又三里許會汾陽之三泉河又二十餘里至大魏城東北入汾陽又二十餘里歸文峪河賈壁水源出龍隱山



東南麓東流二十里入義河版峪水源出縣西北四十五里龍隱山之南南繞西溝版谷諸村復東北入義河城北十五里截義河築堰曰柳坡堰通水南入渠口東南流分溉中辛安閻家莊辛莊司馬南辛安東莊仁智清義八村之地爲義河中堰其上流爲上堰下流爲下堰二堰並溉汾陽縣地今義河一歲之中通流不過數十日往時康熙年間猶修築築堰且因分水構訟近則渠雖仍舊罕有如期堵堰者豈視之不甚惜殆亦工費多而獲利少耳

勝水出孝義縣西南玉泉山東北麓山卽狐岐之別嶂也東流逕柏山之陽俗呼爲左水又東北逕故六壁府南有陂曰元象泊一名勝水陂勝水左合西陽水又東決谿之水出玉泉山東麓東北流二十五里注之又東逕縣南引渠資溉元和郡縣圖志孝義縣勝水在縣南一里是也又東漕谿之水出玉泉山南麓東北流四十餘里注之又東入文水

水經注文水逕中陽縣故城東又東南流與勝水合水西出狐岐之山東逕六壁城南又東合陽泉水又東逕中陽故城南又東合文水今俗呼是水爲左水而以盤重原之水爲水經注之勝水失之也是水自



導源五十餘里與西陽水會又二里許納玦谿又三里北岸引渠曰潤民渠又東五里北岸引渠曰興隆渠又十里許納漕谿又七里許而與文水會潤民渠在城西南二里許引過護城隄下經城南堡牆內繞城而東興隆渠在潤民渠之下其下勝水北岸則有仁義洪露馬道長興仁和中南六渠南岸則有馬任盤糧二渠潤民渠明洪武九年重濬溉城東大村小村長興長黃馬莊屯清義仁智南辛安盧家莊東盤糧十一村地興隆渠溉城東橋子上長黃馬莊屯清義仁智蘇家營七村地因興隆渠東注而蘇家營仁智清義諸村地在渠北 國朝雍正十年知府崔應階知縣陸拱辰令移西濬渠今呼崔陸渠仁義渠明萬歷三十七年開洪露渠明洪武初年所開後廢別開今渠溉大村地馬道渠溉小村地長興渠溉長興村地馬任盤糧二渠俱溉東盤糧地仁和中南二渠俱溉盧家莊地漕溪一名普濟民渠在城南十里許北岸引溉南漕村張魏村西盤糧地南岸引溉梧桐村地今頻歲乾涸惟雨多水發藉以灌溉及隆冬河凍上流積水冰解水湍亦可引灌

西陽水出高唐山之南麓元和郡縣圖志溫泉縣西陽

水源出縣東北去縣十里是也其澗東流俗呼爲南川有澗水北自白雀山東流十餘里注之又東北吐京泉東北流三里許左會於谿北魏孝昌中吐京郡僞置是間也或言吐京泉卽水經注之陽泉水是谿蓋所謂陽谿矣又東北左合盤重原之水又東逕故六壁府北又東入勝水

水經注陽泉水出西山陽谿東逕六壁城北又東南一流注於勝水今吐京水流出未遠卽赴谿澗俗呼爲孝河南川者也其澗西自高唐山導源循山谿而東二十里則白雀烏雞兩山之間其澗南流注入又四十餘里乃會吐京水谿曰陽谿故谿測之泉曰陽泉至薛家會東而合西來盤重原水又八里許入於勝水水經注但舉陽泉不復溯其澗所自耳吐京泉附近吐京村乾隆二十七年元村農民與吐京農民爭引水構訟連年不已三十四年據知縣鄧必安勘明吐京村地在南川南之上游元村地在北川北之下游所爭本屬風馬牛不相及因南川舊循山麓泉出雖高近卽入澗故吐京村無地可溉後澗漸北徙泉流稍長澗南之地皆可引灌而元村人乃謂吐京村向無水利明文欲遏是流逾南北兩川入白龍渠以



溉元村地寔爲龍岡如縣所陳泉斷歸吐京村民築堰引溉

盤重原水出原東谿澗今俗呼孝河東北流有澗水東南流十餘里注之又東南薛頡嶺東南麓之水東流池南注之又東南逕白壁關會於高唐山之水

盤重原在狐岐山下其南水由隰州至靈石縣入汾其東水則俗自爲孝河北川者也自導源二十里合一澗水俗呼狗兒溝出薛頡嶺狐岐兩山之坳又十五里合薛頡嶺東南麓谿澗俗呼界裏頭水其水東繞白駒相王等村之東復南流入北川又四十餘里

與高唐山水會縣西北三十餘里賢者村之瓦原灘有泉南流入北川名清水泉前明村人劉大剛濬渠溉地呼爲獨力渠縣西二十餘里鑿渠引北川之水曰白龍渠舊有支渠六今支渠並廢惟存總渠溉元村及賈家莊地

白溝水導源孝義縣西南十五里東流入於汾

水出真興村俗呼白溝河東流二十餘里溉下柵梧桐玉屯北姚等村地

靈石北山水北流至孝義縣南二十里俗呼王同河轉東入於汾



水導源靈石界高仁村至孝義縣王馬村東流十餘里澗之北溉玉屯王屯北姚南姚四村地澗之南溉董屯村地白溝王同一澗源近流小灌地亦甚微柳壁水導源孝義縣南三十里遼壁村遼柳一聲之轉卽北魏所置六壁之一也其水東流入於汾

此水俗呼嶺北溝長十餘里溝南卽介休縣嶺北村孝義縣境北七里居義村有泉曰海眼泉水色深黑舊資灌溉今廢縣西高唐山測有泉曰溫泉白雀山下有泉曰黑龍池縣南二十八里有泉曰冷泉縣西百四十餘里地名弓家灣有谿澗東流三十餘里經

一盤重原之南白雀高唐二山西麓之水自北來注之又南逕玉泉山西四十餘里至劉家沿村南接隰州中窰村澗之西一澗導源隰州北野高泉東北至孝義縣西南百四十餘里地名採樹澗繞白家莊諸山之陽東流四十餘里南接隰州大麥交鎮又西一澗出隰州北九十里黑龍溝山之陰山東北距孝義縣治百二十餘里其山屬隰州溝屬孝義繞山麓東流十餘里亦南接隰州大麥交鎮此三水並由靈石縣入汾三澗以東玉泉山南麓之水東南流十餘里左會一澗出縣西南五十里止善村西南流十餘里注

於玉泉南谿而南由靈石縣入汾

以上汾陽孝義二縣合文水歸汾及自達於汾之水

